


USA KA TRUMPETA

NGA NAGATINGOG OG

DILI-MATINO NGA TINGOG

 Salamat kaayo, Igsoong Demos. Usa ka dakung pribilihiyo ang maania niining Cristohanong panagtigum karong gabhiona, dinhi niining niyebohon nga probinsya. Ug nanawag ako sa balay, kaganina, ug mga baynte ang temperatura nga mas init didto, didto sa Amihanan, kay sa dinhing dapita. Nadala ko tingali kana. Magdali-dali ko ug aron nga makabalik pag-usab, sa gilayon. Nanggahi na sa tugnaw ang tanang mga tanum. Unsa ma'y hunahuna mo mahitungod niana, Creechy? Kini'y usa ka . . . [Nagaingon ang igsoong lalaki, "Bugnaw lagi."—Ed.] Mao gayud.

² Ug malipayon kaayo ko nga mahimamat kining maayong pastor, karong gabhiona, ug makita kamong mga tawo. Bag-ohay lang ako nakaabot, pipila pa lang ka gutlo. Gikan ko sa Tucson, diin kinahanglan kong moadto karong adlawa. Mibiyahé ko kagabii, ug nakaabot ko og mga alas dos-traynta kaganinang buntag, didto sa Tucson. Ug dayon dili na nakatulog tibuok adlaw, didto. Ug migikan ko kaganina lang. . . Bueno, nakaabot ako, bag-ohay lang nga mga usa-ka-oras-ug-tunga na, siguro, mora'g ingon niana, dinhi. Ug mao nga wala kaayo ko'y tulog. Pero paningkamotan ko nga dili makatulog dinhi. Pero malipayon kami—kami nga maania dinhi.

³ Kining gamay'ng batang lalaki, nga nagadula-dula niining mga mikropono dinhi. Milingkod man ko dinha sa luyo, diha sa . . . usa sa lingkoranan sa mga gagmay'ng bata. Miduol ang gamay'ng batang lalaki, og mitan-aw sa ako nga natingala gyud. Ingon ko, "Kitang tanan nga mga bata puede mang molingkod nga magkauban, dili ba?" Bueno, gihigugma ko gayud silang mga bata, bisan pa man.

⁴ Ug kini'y, oh, maanindot gayud nga maania karong gabhiona, ug ang makauban kining maayong mga mananambong nga nanagtindog sa palibot. Ug nagasalig ako nga nasulti na kaninyo ni Igsoong Williams ang mahitungod sa, ug ni Igsoong Rose dinhi, ang mahitungod sa umaabot nga konbensyon. Sa hunahuna ko nahibalo na gyud mo niini. Nga igapahigayon didto sa Ramada, sa gilayon, ang konbensyon sa Business Men. Ug nagalaum kita og usa ka halangdon nga kahigayonan didto. Si Igsoong Velmer Gardner, usa ka maayo

kaayo, makusganon nga mamumulong; ug uban pang mga ministro, si Oral Roberts ug daghan pa, ang moadto didto. Ug nagalaum kita og halangdon nga kahigayonan diha sa Ginoo.

⁵ Nagalaum sàb ko, nga usa sa niining mga panahona, makapahigayon unta kita og usa ka panerbisyo sa pagpang-ayo niadtong lugara. Uh-huh. Gusto kong awhagon si Igsoong Oral, ug mag-uban kami. Oo, sir. Dili ba maayo kaayo kana? Mamahimo kanang usa—usa ka nindot gyud nga pagsugod para niini, dili ba? Usa ka panerbisyo sa pagpang-ayo, didto sa Ramada, maayo kana. Kita... Busa mahimong buhaton nato kana, kabalo mo. Mahimong ihatag kana sa Ginoo para kanato, nga makapahigayon og usa ka panerbisyo sa pagpang-ayo. Busa atong... Nagaadto tà karon, gikan sa usa ka iglesia ngadto sa usa pa ka iglesia, sa pagpaninguha nga mapakaylap ang maayong balita, ug aron magpakigkauban sa usa'g usa, ug magpakig-fellowship sa tanang nagkalainlaing mga iglesia. Mao kana ang atong ginatoohan, nga kita usa ra, diha kang Cristo.

⁶ Nakig-istorya ako sa usa ka doktor niadtong miaging adlaw. Hapit na man kong molarga ngadto sa gawas-sa-nasud, ug mao nga gikinahanglang magkaaduna og usa ka pisikal nga eksaminasyon. Busa miadto ako para sa maong eksaminasyon. Ug gipahimutang niya ako sa usa niadtong mga wave... ako... Ayaw na ako pangutan-a kung unsa kadto. Ug may nakaplagan siya nga usa ka talagsaong butang. Ug mibalik siya ug wala kadto masabti, ug mao nga nangonsulta siya sa usa ka grupo sa mga doktor, tungod dili man gyud niya kadto masabtan. Ingon siya, “Wala pa ako sukad nakakita og ingon niana kaniadto.” Ug busa gipakita niya sa ako ang hulagway niini, kung unsa nga kasagaran ang panimuut, ug aduna ka'y ilalum-nga-panimuut, ug halayo kaayo ang mga niini sa usa'g usa. Pero namatikdan niya nga ang sa ako magkauban ra ang mga niini. Miingon, “Usa ikaw ka talagsaon gayud nga tawo.”

Ingon ko, “Nasayod na ako niana sa una pa. Nasayod man ang tanan.”

⁷ Miingon, “Wala pa gyud mi sukad nakakita og ingon niana kaniadto.” Busa gisulti niya kanako ang mahitungod niini.

⁸ Ingon ko, “Bueno,” ingon ko, “abi nimo, siguro ang buotan nga Ginoo, sa dihang gilalang Niya kita, gibuhat Niya kita nga managlahi diyutay. Dili pareho ang atong mga itsura sa usa'g usa, ug usahay dili gani kita nagalihok nga susama sa usa'g usa. Apan—apan ginabuhat Niya kini alang Kaniya... sa Kaugalingon Niyang pamaagi nga pagbuhat niini. Nagasulod lamang kita sa dakung makina nga hulmahan, ug kita wala'y lihok, nga ginahulma Niya sa kung unsa man ang gusto Niyang himoon kanato.”

⁹ Ug ako—nasayod ko nga walay tawong motinguha nga mamahimong unsa man gawas sa kung unsa ka gayud. Ang

bugtong butang nga mahimo natong tanan tinguhaon . . . Human nga kita naluwas ug nahimong mga anak sa Dios, ang bugtong butang nga ginatinguha nato mao lamang ang mas haduol pa nga pagkinabuhi sa matag adlaw. Mao kana'y atong ginapangandoy, kanang mahimayaong pagpakig-fellowship. Pagkaanindot gayud niana! Mahimo ba nga mohunong usa kamo aron palandungon kung unsa kaha'y buhaton nato kung wala kita niana? Unsa—unsa . . . Kung wala nagpabilin kanato kanang dakung paglaum, unsa kaha'y buhaton nato?

¹⁰ Gisulti ko kaniadto, sa usa sa mga iglesia, mahimo ko bang . . . Una, didto sa usa ka lugar, pagkahuman sa usa na usab, ug sa tibuok nasud nagapahayag ako usahay, ngani basin nasulti ko na kini pag-usab sa mao gihapon nga iglesia. Pero pagawas ako kaniadto sa bilding kon diin medyo nakasulti ako og mabagison gayud, mahitungod niining mga tawo sa karong panahon nga nagasayaw niining bag-ong sayaw nila, nga ginatawag nila og twist, o ingon niana. Ug ingon ko, “Dili gyud nako masabtan, kung ngano gyud kaha, nga gusto sa mga tawo nga balion ang ilang mga bitiis ug—ug manglihok nga ingon niana.”

¹¹ Busa, dihay usa ka lalaki, nga mga baynte-sais, baynte-siete anyos ang pangidaron, ang mitagbo sa ako didto sa luyo, og miingon, “Kadali lang, Mr. Branham.”

Ingon ko, “Oo, sir?”

Ingon siya, “Abi nimo, wala lang gyud ka nakasabot.”

Ingon ko, “Galaum ko nga dili pud unta nga wala nako masabtan.”

¹² Ug miingon siya, “Abi nimo,” ingon siya, “nasabtan ko man ang imong punto.” Ingon pa, “Usa man ka ka tawo nga singkwenta anyos na ang pangidaron. Pero kung kaedad tà ka, siguradong lahi gyud.”

¹³ Ingon ko, “Kadali lang.” Ingon ko, “Ginawali ko na ang Ebanghelyo kaniadtong mas batan-on pa ako og napulo ka tuig kay kanimo. Hangtud karon ginatoohan ko gihapon ang mao ra nga Ebanghelyo. Nakaplagan ko ang usa ka butang nga pangpuli niana, ug mas may labaw nga kalipay ang pagpangalagad sa Ginoo kaysa tanang mga butang nga mahimo sa yawa sa kon asa man.” Kini'y usa ka . . . Nagahatag kini og katagbawan.

¹⁴ Kabalo mo, miingon si David, usa ka higayon, “Ingon nga ang laking-lagsaw nagakauhaw sa tubig sa sapa, ang akong kalag nangandoy sàb sa pagpangita Kanimo, Oh Dios.”

¹⁵ Ug kung nakakita na mo og usa sa gagmay'ng mga lagsaw, pag siya—siya'y samdan, tingali'g gisakmit siya sa mga iro, ug gipaak ang daku nga bahin sa iyang kilid, o ingon niana. Nagadugo siya. Ug, siya, mahimo siyang sundan sa iro. Dili man gud kini sama sa tawo. Ug mahimo sa iro nga gukdon ang lagsaw

bisan nagadugo kini o wala. Ug mao nga ang bugtong paagi. . . Kung nagadugo ang maong usa, ang bugtong paagi nga mabuhi siya mao ang makaadto sa kon diin adunay tubig. Ug kung makaabot ra kini sa kon diin adunay tubig, moinom gyud kini og tubig. Mohunong na dayon ang pagdugo niini, ug—ug makalagiw na kini. Maalisto kaayo kini.

¹⁶ Ug inyong mahulagway mismo, nga makita ang usa sa gagmay'ng mga lagsaw nga samdan ug nagadugo, ug kung unsa nga nakahangad ang iyang gamay'ng ulo, ug ang tibuok sensya nga aduna siya aron sa pagkaplag kon diin ang tubig, pinaagi man sa iyang ilong. Basta, gikinahanglan gyud niyang makakaplag og tubig, kay kon dili mamatay kini. Ug mao nga kinabuhi ug kamatayon gayud kini, para kaniya. Siya, sa matag—matag—matag gamay'ng humot nga iyang masimhotan, nagapaningkamot gyud siya, og nagahinamhinam. Gikinahanglan gyud niya kining makaplagan.

¹⁷ Bueno, ingon niana pud unta ang pagkauhaw nato sa Dios. Kita n'yo? “Ingon nga ang laking-lagsaw nagakauhaw sa tubig, ang akong kalag nangandoy sàb Kanimo, Oh Dios.” Ang maitago uban Kaniya sa kon asa man, mao'y tinguha sa akong kasingkasing. Ug nagasalig ako nga mao pud unta kana ang tinguha sa tanan nga ania karong gabhiona.

¹⁸ Ug karon, matag gabii, gusto kong makita kini. Ang mga nawong nga makita mo sa usa ka lugar, makita pud nimo sila sa usa pa ka lugar. Ako—gusto ko kana. Ginapakita ninyo ang inyong pagpakig-fellowship, ug ginapahayag ang hinungdan nga ania kita dinhi.

¹⁹ Ug, oh, gusto ko gayud makakita og usa ka kinaarang rebaybal sa Phoenix. Oh, pagkanindot! Ang pulong nga *Phoenix* nakapalipay gyud kanako sukad niadtong unang higayon nga nabasa ko kini, ang mahitungod niini: Phoenix, Arizona. My, bata pa lang ko, nahunahuna ko na, “Kung makaadto lang gyud ako nianang lugara! Kung makaadto lang ako didto, sa Phoenix!” Ug karon ang makita kini, ug sa dihang ania na kita nakaplagan nato kini nga naglunang og ayo sa kasal-anan, sama sa tanang uban pa nga mga lugar, nga ginatapokan sa mga turista; ug nanag-inom og makahubog, nanagpatuyang, pagka-imoral na gayud, og tanan na.

²⁰ Apan, bisan pa, sa tanan niana, makakaplag gihapon ka og pipila ka tinuod nga mga mutya nga giyugyug sa Dios gikan niining bahin sa disyerto, nga nagasidlak diha sa purong-purong sa matahum nga katawohan sa Dios. Ug mao kana'y hinungdan nga ania ako, karong gabhiona, aron makig-uban mismo kaninyo nga mga igsoong lalaki ug kaninyo nga mga igsoong babaye, aron ipadan-ag ang Kahayag ni Ginoong Jesus ngadto sa uban, aron nga mahikaplagan sila, usab, taliwala sa niining dakung kagubot. Ug daghan kanila ang anaa pa dinha. Pero kumbinsido

ako niini. Nga daghan pa sa gihapon ang magasulod, ug mao nga kinahanglan natong buhaton ang tanan nga mahimo nato aron kuhaon sila dinha, ug ikinabuhi ang usa ka kinabuhi nga igareplektar si Cristo.

²¹ Karon, sa dili pa kita mobasa og usa ka hamubong teksto sa Kasulatan . . . ulahi na gyud kong nakaabot mao nga pipila ra ka sinulat ang akong nasulat, sulod sa mga lima ka minuto. Ug bag-ohay lang ko gipadalhan sa pang-nasudnong maniningil sa buhis og mga dokumento para sa buhis, mao nga kinahanglan pud nakong ipadala sa gilayon, ug gikinahanglan pud kining mapaselyohan, sa hunahuna ko, hangtud karong adlaw ra, siguro. Ug busa kinahanglan kong moadto sa post office. Ug sa pag-abot ko, miingon si Billy, “Pagdali gyud.” Ug mao nga ania . . .

²² Sige ra gyud ko’g pabalik-balik, ug pabalik-balik, pabalik-balik, niadto nga mga tawo. Grabe, oh, grabe! Nagahisgot sila mahitungod sa hustisya diha sa mga pultahan sa korte. Pero asa na kaha kini. Oo. Wala pa man gud ko’y nakita nga hustisya. Ug gusto nila nga mobayad ako og buhis sa matag tseke nga gikahatag sa ako sa nangaging singkwenta ka tuig, para ibayad sa mga balayronon sa buluhaton, nga duna na’y tubo ug multa niini, kita n’yo, nga tulo ka gatus ug singkwenta’y-singko ka libo nga dolyares.

²³ Ingon ko, “Pusila n’yo na lang ko.” Unsaon ko kaha pagbayad niana? Ingon ko, “Halos wala gani ko’y sobra sa singkwenta’y-singko sentimos.” Ingon pa ko, “Unsaon ko man pagbayad niana?” Ug gihasal gyud nila ako sulod sa lima ka tuig.

²⁴ Bueno, bahin sa mga tawo nga nagahatag. Pananglitan, kon magpahigayon kami og usa ka buluhaton, ug—ug ang mga tawo, nahibalo man sila nga William Branham ang akong ngalan, mao nga nagahatag na lang sila og tseke para sa mga balayronon. Ang mga ministro na dayon ang bahala niana. Wala pa gayud ko sukad nagkuha og usa ka offering sa tibuok kong kinabuhi. Ug busa nagakuha sila . . . nagadawat man ko og—og suweldo gikan sa akong iglesia, usa ka gatus ka dolyares kada semana.

²⁵ Ug kining offering . . . Pero ang matag usa, kita n’yo, ginabutang nila kana diha sa . . . Ug pagkasunod buntag, ang—ang—ang—ang pangulo sa komite sa panalapi, moanha siya ug moingon, “Igsoong Branham, kinahanglan mong pirmahan kining mga tseke.” Ug, aba, igo ko lang pirmahan ang maong mga tseke. Ideposito na dayon niya kini. Ug dayon gisusi nila ang tanan niadto, ug wala gani ni usa man lang ka sentimos ang nagasto para sa kaugalingon ko. Pero sa pagpirma ko niadtong tseke, miingon sila nga akoa kono kadto. Ginahatag bitaw kadto sa mga tawo kanako, dayon ginahatag ko usab kadto sa iglesia. Oh, my!

²⁶ Mao nga nasubo gyud ako, sa primero, pero pagkahuman hingsayran ko nga ang matag tawo diay sa Biblia, nagatoo ko, nga nagkupot og espirituwal nga katungdanan para sa Dios, nalambigit man pud sa pangnasudnon nga gobyerno. Susiha n'yo kana ug hibaloa. Tinuod kana. Sila ni Moises, Daniel, Juan Bautista. Ngani si Jesus Cristo namatay man sa kamot sa pangnasudnong gobyerno, ilalum sa silot nga kamatayon. Sila ni Pedro, Santiago, Juan nga tigpadayag, ang tanan, ang matag. . . Ang tanan miantus gyud og pagpanglutos.

²⁷ Ngano man? Tungod kini man mao ang puy-anan ni Satanas. Nasayod ba mo niana? Nasayod ba mo, nga gidala ni Satanas si Jesus sa hataas ug gipakita Kaniya ang tanan nga gingharian, sa kalibutan, sa usa ka gutlo sa panahon? Ug miingon siya, “Sa akoha ang mga niini. Ginahimo ko sa mga niini ang bisan unsa man nga gusto ko. Kita Mo? Ug ihatag ko ang mga niini Kanimo kung moyukbo Ka ug simbahon ako.” Busa nakita n'yo na kung si kinsa ang nanag-iyas sa mga niini? Dili unta nato gustong hunahunaon kana mahitungod sa atong gobyerno, pero mao man gayud.

²⁸ Busa miingon Siya, miingon si Jesus, “Pahawa ka, Satanas.” Nasayod man Siya nga pagapanundon man Niya ang mga niini, sa Milenyum. Nasayod Siya nga mama-Iyaha ang mga niini pag. . . Kon, kon kining mga nasud pagadumalahan na sa Dios, nan magsugod na ang Milenyum. Ug moabot gyud kana nga panahon.

²⁹ Aduna kono sila'y mga U.N. ug Leagues of Nations, ug tanan na, aron maghatud og pakigdait. Pero samtang si Satanas ang anaa sa itaas niini, ug sa pulitika, unsa ma'y mahitabo? Mag-away-away sila sa ingon ka sigurado gayud.

³⁰ Apan moabot gyud ang panahon nga ipangkamada na ang tanang mga armas. Ug magatingog ang pang-sundalo nga mga trumpeta, ug ang Eternal mobanagbanag na, nga mahayag ug matahum. Ang atong Hari magalingkod na sa Iyang trono. Oh! Magkaaduna gayud og panag-awit; magkaaduna og panagsinggit. Ug magkaaduna og usa ra ka bandila, usa ka katawohan, usa ka nasud, nga magasulti og usa ka pinulongan, nga Langitnon. Amen. Ginapangandoy ko gayud kanang panahona. Ug nagapadayon ako ngadto nianang dauganan, nagasalig sa Dios, nga sa umaabot nga adlaw pag matapos na kini, masulti ko. . . madungog ko Siya nga magaingon kanako, “Saka ngari.”

³¹ Ngani ania ako sa Phoenix karong gabhiona sa Ngalan sa Ginoo. Ako—dili ko na isaysay kung unsay nahitabo. Daghan kaninyo ang nagakuha og mga teyp, siguradoha n'yo nga makakuha kamo niadtong, *Unsa Na Kaha Kini Nga Panahon, Sir?* Kadto mao'y sa wala pa ako migikan sa balay. Gipadala ako dinhi sa usa ka panan-awon; nga, wala ko kabalo kung

unsa . . . wala ko . . . wala ako nagabaligya og mga teyp, ug dili ko ginapamugos ang ingon-anang mga butang. Ginarekord namo ang mga niini, ug aduna kami og buluhaton sa pag-teyp sa tibuok kalibutan. Mao nga didto sa mga kalasangan ug sa bisan asa man, aduna sila’y gamay’ng butang nga ilang ginabutang sa mga dalunggan, nila, ug mahimo kining irekord diha sa teyp, ug motindog didto ug hubaron mismo ngadto sa maong pinulongan. Ug nagaabot kini sa tibuok kalibutan.

³² Ug, kadtong usa nga ako nang nawali, kadtong *Unsa Na Kaha Kini Nga Panahon, Sir? O, Mao Na Ba Kaha Kini Ang Panahon, Sir?* Usa ka . . . ako . . . Sabado sa gabii kadto, tulo ka semana na ang milabay, didto sa iglesia. Bisan nakakita na ko og mga panan-awon sa tibuok kong kinabuhi, wala pa ko nakasinati og unsa man nga ingon niini kaniadto, sa akong kinabuhi. Ug wala ko kabalo kung unsa kini. Basta ania lang ako, tungod gipadala Niya ako dinhi. Wala ko kabalo kung unsay buot ipasabot niini. Igo lang kong . . . Basta ania lang ako.

³³ Ug kinahanglan akong magmatinud-anon ug sinsero, ug mao lang kana ang bugtong paagi nga makadangat kita sa kon asa man diha sa Dios, mao ang magmatinud-anon. Tungod, mahibalo man ang mga tawo. Nasayod mismo ang Dios, sa sinugdan pa lang, kon dili ka matinud-anon, kon magmatinud-anon ka ba o dili. Ug mahibalo pud ang mga tawo. Tungod kay, usa niadto ka higayon, may usa ka tawo nga naninguhang magpropesiya. Ug gisultihan sa Dios . . . O, gisultihan siya sa tinuod nga propeta, ang ingon, “Atong hinumduman. Aduna na’y mga propeta nga nahiuna kanato. Hiilhan lamang ang propeta pag nahitabo na ang iyang propesiya.” Busa mas maayo nga siguradohon nato nga nasayod kita nga mao gayud ang giingon sa Dios, adisir kita mosulti og unsa man mahitungod niini. Magmatinud-anon ug sinsero.

³⁴ Karon iduko nato ang atong mga ulo sa makadiyut alang sa pag-ampo. Karon ipadaplin nato ang matag kabalaka, sa mosunod nga pipila ka minuto. Nahunahuna ko . . . Dinhi niining hiligugmaon nga grupo sa mga tawo karong gabhiona, nasayod ako nga adunay mga mutya nga ania dinhi nga anhion ni Jesus aron pagakuhaon sa umaabot nga adlaw, nga mahigmata gikan sa abog.

³⁵ Ug mahimong dunay pipila dinhi nga dili pa ingon ka sigurado kung mamaatua ba sila didto, o dili. Tingali’g may gikinahanglan kamo nga uban pang butang. Kung aduna ma’y panginahanglanon sa inyong kinabuhi karong gabhiona, ipahibalo kana sa Dios, samtang ginapataas ninyo ang inyong kamot, og moingon lamang, “Dios, nasayod Ka kung unsay buot kong ipasabot karon. Ug panalangini ako. Ako—nagmasakiton ako. Nagkinahanglan ako og kaayohan. Ako’y—nahisalaag ako. Gikinahanglan kong mobalik sa pagpakig-fellowship. Ako—ginatinguha ko nga mobalik. Ako’y—nasayup ako. Mobalik

na ako. Ginatinguha ko nga tabangan Mo unta ako, karong gabhiona, nga makabalik.” Panalanginan kamo sa Dios.

³⁶ Langitnong Amahan, samtang nagaduol kami karon sa Imong trono, pinaagi sa Dugo, ingon nga, misulod kaniadto si Aaron sa atubangan sa—sa lingkoranan sa kalooy, gikuha niya, una, ang dugo sa iyang kamot, ug misulod na siya, ug kami, pinaagi sa pagtoo karong gabhiona, among ginadawat ang Dugo ni Ginoong Jesus, ug nagalakaw paingon sa trono sa Dios, nga maisogon, ingon nga nasayod na nga may katungod kami nga moduol, dili nga tungod sa kaugalingon namong pagkamatarung, kondili sa Iyaha. Ang Dugo ang nagarepresentar sa paghinlo kanamo. Ug ginaampo ko, Langitnong Amahan, nga itugot Mo unta ang among ginahangyo.

³⁷ Una, among ginapangamuyo nga kaloy-an Mo unta kami, nga pasayloon kami sa tanan namong mga kalapasan, samtang ginasugid namo ang among mga sayup, ug ang among mga gagmay'ng kasaypanan, ug ang among tago lang nga mga sala, ug ang among wala-hibaloi nga mga sala. Ug ginasugid usab namo ingon nga mga ministro, ingon nga mga sacerdote, ang mga sala sa mga tawo. Magkauban kami, Ginoo, nga nagabarug. Gihigugma namo ang mga tawo. Mora kami og si Moises sa dihang gipahimutang niya ang iyang kaugalingon diha sa gintang, aron mapanalipdan ang mga tawo, sa kapungot sa Dios. Grabe kadto nga pagpakita, sa pagkamatarung nga iya ni Cristo, sa dihang gipahimutang ni Cristo ang Iyang Kaugalingon diha sa gintang, aron luwason ang mga tawo!

³⁸ Ug, Amahan, kami ingon nga Iyang mga alagad, nga ania kanamo ang Iyang Espiritu, og sa matag Cristohanon nga ania karong gabhiona, nga ginapahimutang ang iyang kaugalingon sa atubangan sa makasasala: “Dios, magmaloloy-on Ka kanila.” Nagatuaw kami alang sa mga may sakit ug sa mga nanginahanglan, alang nianang bililhon nga mga kamot, nga ang pipila kanila mga tigulang na, ug ang uban mga batanon pa, ug ang uban pud mga hamtong na, nanagpataas sila sa ilang mga kamot. Nasayod Ka sa tanan-tanan mahitungod niana, Ginoo. Ginaampo namo nga magatubag Ka sumala sa Imong mga bahandi sa himaya.

³⁹ Hinaut nga daghan unta karong gabhiona, Ginoo, ang manguli gikan dinhi, nga nanganhi, nga may sakit, hinaut nga managpanguli sila, nga himsog, og giayo na. Nga aduna gyu'y butang nga nahitabo, og dili gani nila maisaysay kini, pero nasayod sila nga naayo na sila.

⁴⁰ Hinaut nga kadtong mga nahisalaag managpanguli sàb nga gimatarung na, Ginoo, ingon nga hingsayran namo nga namalik sila ug gibalikan si Cristo kon diin nila Siya gibiyaan. Hinaut nga manguli sila, og magapasig-uli. Itugot, Ginoo, nga kadtong

mga wala pa gyud nangduol makaplagan unta kanang bilihong kagawasan sa pagkahimong gawasnon, nga nakagawas na gikan sa hawla, og dili na nagapus sa mga butang sa kalibutan ug sa mga kabalaka niining kinabuhia, kondili nahimo nang gawasnon diha kang Cristo. Itugot kini, Amahan.

⁴¹ Panalangini ang tanan namong gikinahanglan karon, ug panalangini sàb ang Imong Pulong ug ang Imong alagad, ug pagadayegon Ka namo. Sa Ngalan ni Jesus among ginapangamuyo kini. Amen.

⁴² Karon, kung mobasa kita og usa ka teksto sa Kasulatan, o usa ka Kasulatan ingon nga usa ka teksto, diay, ang Unang Mga Taga-Corinto sa ika-14 nga kapitulo, sa ika-8 nga bersekulo, ingon niini ang mabasa, sa Unang Mga Taga-Corinto 14:8.

Kay kung ang trumpeta nagahatag og dili matino nga tingog, kinsa man ang magaadam alang sa gubat?

⁴³ Igo na kini nga teksto nga mahimo natong iwali sulod sa duha ka semana gikan karon mahitungod niini, pero dili gyud gihapon nato mahisgotan bisan ang mga kadaplina niini. Aduna gyu'y sa kung unsang butang sa Pulong nga dinihogan. Padayon ka lang nga anaa diha nianang usa ka teksto. Tungod mahitakdo mo man gud niini ang tibuok Biblia. Husto kana.

⁴⁴ Ngani usa ka adlaw gipangutana ako sa usa ka lalaki, miingon, “Ginaunsa mo man paghisgot ang mao gihapon nga teksto?”

Ingon ko, “Oh, my! Makahisgot ka man og bisan unsa nga konteksto gikan niini.”

⁴⁵ Mipudyot ako og usa ka gamay'ng clover nga may tulo-ka-dahon nga anaa sa yuta, ug gipataas kadto. Ania gani dinhi karong gabhiona ang maong lalaki, nga taga Tucson. Ug atua kami kaniadto sa Pasadena, California. Ug miingon ko, “Puede kong hisgotan kining clover nga may tulo-ka-dahon ug magwali sulod sa baynte-singko ka tuig mahitungod ra niini: kung unsa nga usa kini ka kinabuhi, ang anaa sa sulod niini; kung unsa, nga ang tulo ka dahon, usa ka trinidad kini diha sa Usa ra. Ug, oh, oh, pagkadaghan kaayong mga butang nga masulti nato mahitungod niini.”

⁴⁶ Ug unsa pa kaha ang usa ka Kasulatan? Kini mao ang Pulong sa Dios. Eternal Kini. Kini—kini'y . . .wala Kini'y katapusan. Kini'y nagapadayon lang, nga nagapadayon, og nagapadayon. Usa Kini ka dalangpanan para kanato.

⁴⁷ Ug karong gabhiona gusto kong maghisgot mahitungod niining: *Usa Ka Trumpeta Nga Nagatingog Og Dili-matino Nga Tingog.*

⁴⁸ Sa paghunahuna ko mahitungod niini, kaganina, sa dihang gihunahuna ko ang mahitungod sa . . .kadtong problema sa buhis, nahunahuna ko, “Halos wala na gyu'y unsa man sa karong

panahon nga sigurado gayud. Wala na gayu'y kasigurohan ang tanan." Ug ang unsa man nga walay-kasigurohan dili masaligan. Ang unsa man nga walay kasigurohan dili gyud masaligan. Layuan n'yo kana kung dili kana sigurado.

⁴⁹ Kung aduna ka'y negosyo; ug, ngani, aduna man kita'y mga negosyante nga ania karon, siguro daghan kanila. Kung nagadumala ka og usa ka negosyo nga walay kasigurohan, nan dili gyud ka mamuhonan og daku diha niana, tungod kay ang—ang dibidendo wala ma'y kasigurohan, ug mao nga dili gyud ka mamuhonan og daku diha niana. O kaha, kung usa ikaw ka maayo, utokan nga negosyante, nan maghulat sa ka ug mangsusi, kung aduna man ka'y kuwarta nga ipuhonan, hangtud nga makakita ka og usa ka butang nga sigurado gayud, usa ka negosyo nga kasaligan, usa ka butang nga imong masaligan. Tungod, dili mo gusto nga mawala kanang diyutay'ng kuwarta nga imong gitigum, tungod kay dinha mo kinahanglan kuhaon ang imong panginabuhian, gikan sa ganansya mo sa—sa mga dibidendo nga madawat gikan sa maong puhonan. Bueno, gikinahanglan pud nimo nga—nga adunay makuhaan og panginabuhian.

⁵⁰ Ug kining diyutay'ng kuwarta nga imong natigum, ayaw kana ibutang sa imong balsa ug pasagdan lang kana dinha, kay basin kawaton kana sa mga kawatan. Kita n'yo? Ayaw, ayaw n'yo buhata kana. Kung aduna kamo niana, ipuhonan n'yo kana sa usa ka butang. Ug mao nga gusto n'yong sigurohon ang kasiguradohan sa inyong puhonan. Kay kung dili, aba, ayaw na lang kana, ipuhonan.

⁵¹ Busa, ang pagnegosyo siguradong anaa gayud sa dili-piho nga kahimtang karong gabhiona. Ang unsa man nga negosyo, halos, sa kalibutan, anaa sa walay kasigurohan nga kahimtang, tungod nga ang kalibutan anaa pud sa walay kasigurohan nga kahimtang. Mao nga dili mo gayud mapahanugotan ang imong kaugalingon. . .

⁵² "Karon, magtigum ako og *ingon-ini ka dakung* salapi, aron makapatukod ako og usa ka maanindot, nga balay sa kon asa man." Kana, wala gayud kana'y kasigurohan, sultihan ko kamo nga ingon-ana gayud, tungod kay mahimo mang kuhaon sa gobyerno kana tanan, sulod sa usa lang ka gabii.

⁵³ Oh, ang mga butang nga nagpahugaw kaayo sa atong demokrasya, hangtud nga ingon na gayud kini ka dili-kasaligan! Kaniadto mahimo pa natong magpahimutang og dakung pagsalig sa atong demokrasya. Ug, nga, sa hunahuna ko mao ang pinakamaayo nga matang sa pang-gobyerno. Apan, bisan pa niana, ang atong demokrasya dili na kasaligan. Tungod kay, kita, kining nasura, ang atong mga katawohan, aduna kita'y usa ka konstitusyon, ug kini nga konstitusyon mao—mao ang atong pinakabasihanan. Apan, bisan pa, niana, ang atong konstitusyon

dili na kasaligan, tungod kay makadaghan nang higayon kini nga gilapas. Ang mitaliwan na nga si Mr. Roosevelt naghimo og dakung kadaut niini kaniadto. Busa, kita n'yo, nakita n'yo mahimo kining lapason. Mao nga dili ka na makapahimutang og dakung pagsalig diha niini.

⁵⁴ Ang pulitika, oh, grabe, dili gayud kini kasaligan! Basta na lang maglalisay ang mga tawo, ug maglalisay, nga maglalisay, tungod sa pulitika. Ug mag-away-away ang mga silingan, tungod niini, ug mga tawo kini kaniadto nga suod unta nga managhigala. Pagmay usa ka presidente nga motungha, o usa ka tawo ang magpapili sa pagka-sheriff, o ingon niana, ug duna pu'y magpapili og usa ka tawo sa pikas partido sa pulitika, ug maglantugiyay sila sa usa'g usa hangtud nga mag-away-away sila tungod niining, pulitika. Ug dili ko . . . nanghinaut ko nga dili unta ako makapasakit og pagbati ni kinsa man, pero sa tan-aw ko daut na gayud ang maong tibuok butang. Kita n'yo? Oo, sir. Busa nganong maglalisay man mo ug mag-away-away tungod lang sa usa ka butang nga walay kapuslanan? Husto. Grabe na gayud kana.

⁵⁵ Adunay miingon kanako niadtong miaging adlaw, ingon siya, “Mobotar ka—ka ba karong eleksyon?”

Ingon ko, “Mibotar na man ko.”

Miingon, “Oh, sa niini nga eleksyon?”

⁵⁶ Ingon ko, “Mibotar ako para kang Jesus.” Ingon pa ko, “Sultihan ta ka. Adunay duha ka tawo nga mibotar para kanako.” Ingon ko, “Mibotar para kanako ang Dios, ug mibotar batok kanako ang yawa. Ug mibotar ako para sa Dios, busa husto gyud ang akong pagbotar.” Nagadepende ra sa kung asa n'yo igahatag ang inyong boto, kung unsa ang mamahimong resulta.

⁵⁷ Busa, matikdi, bag-ohay pa lang, aron maipakita ko lang sa inyo ang usa ka gamay'ng punto, ug pagkahuman biyaan na nato kini. Sa niining miaging eleksyon sa pagka-presidente, bug-os gayu'ng napamatud-an didto sa Chicago ug sa nagkalainlaing mga lugar, nga ang mga makinarya nga ilang gigamit sa pagbotar, kono, gihan-ay na kadto sa partidong Democrat, nga sa higayon nga mobotar ka para kang Mr. Nixon, kinahanglan sab kono nimong mobotar para kang Mr. Kennedy, sa mao rang higayon. Busa, wala gyud ka'y tsansa. Ug napamatud-an gyud kini!

⁵⁸ Ug nadungog man ninyo sa *Monitor* niadtong miaging gabii, sa dihang nagpahigayon sila og—og pag-survey sa tibuok nasud, gikan sa Mississippi, sa sidlakan. Nakakuha si Mr. Nixon og boto pinaagi sa telepono, upat sa usa. Unsaon kaha pagdaug sa usa ka tawo? Kung si Mr. Kennedy man kadto, mao ra gihapon. Wala baya ko'y ginadapigan nga unsa mang partido.

⁵⁹ Ang akong partido anaa sa Langit, ug kauban ko mismo sila dinhi karong gabhiona. Nagalingkod kita sa Langitnong mga dapit, og naga-istoryahanay mahitungod sa atong Hari.

⁶⁰ Apan, nakita n'yo, gapaningkamot kong sultihan kamo, nga kining mga butang sa kalibutan dili gayud kasaligan. Wala na'y . . .dili kamo puedeng magpahimutang og pagsalig sa mga niini. Wala'y kasigurohan ang mga niini. Ug ang unsa mang butang nga walay kasigurohan, mas gustohon ko pa nga mopahilayo na lang niana. Dili ko gusto kana nga negatibong butang. Dili ko gustong makighilambigit sa negatibong butang. Ang gusto ko'y positibo, ang maanaa sa positibo nga bahin.

⁶¹ Karon, ang pagkinabuhi pang-panimalay wala na usab og kasigurohan. Kabalo mo, nakakita ako og usa ka artikulo niadtong miaging adlaw, sa usa sa mga mantalaan sa usa ka lugar, nga ang porsyento sa panagbulag sa Amerika mas taas pa kono kay sa ubang nasud sa kalibutan. Ug gipakaingon pa gyud ta nga usa ka relihiyosong nasud. Oo, mahimong ingon niana, sa relihiyon, apan dili kini ang husto nga matang. Kita n'yo? Tungod ang relihiyon usa lang man ka pangtabon. Mao nga malisud isulti kung gikan sa unsa nato ginabuhat ang atong pangtabon. Si Adan kaniadto misulay sa paghimo og usa ka pangtabon gikan sa mga dahon sa higuera, pero wala kadto nagpulos. Wala gyud kadto kasigurohan sa diha nga kinahanglan na niyang mogawas aron makigtagbo sa Dios. Busa dili gyud kini matagbo sa relihiyon. Pero mahunahuna n'yo ba nga ang porsyento sa panagbulag nganhi sa ato, mas taas pa kay sa—kay sa tanang uban pa nga mga nasud, ang porsyento sa panagbulag nganhi sa ato? Makita nato nga mitaas na ang imoralidad sa sulod sa atong mga panimalay.

⁶² Makapakurat gayud nga masayran, nga, sa pag-survey sa nasud dakung porsyento, ug sa . . .nagatoo ko nga didto kini sa Ohio, kon diin gihimo ang usa ka pag-survey mahitungod sa Cristianismo, ug makapabalaka gayud ang porsyento sa mga wala na nagasimba. Ug dayon, mga otsenta porsyento kono sa mga nagasimba, wala nahibalo kung ngano nga nagasimba sila. Wala sila nahibalo kung ngano nga nagasimba sila. Basta nagaadto lang sila sa simbahan.

“Nganong nagasimba man ka?”

⁶³ “Bueno, ginadala na man gud mi ni mama kaniadtong mga bata pa kami, ug padayon lang pud ming nagasimba.” Ug—ug dayon, karon, ang laing porsyento niadtong, miingon pud nga nagatambong sila para lang, oh, aron kono makigkita sa ilang mga silingan ug makig-istorya kadali. Kita n'yo?

⁶⁴ Aba, makapabalaka gyud kana! Dili ikatingala nga napukan na ang pagkinabuhi sa panimalay, kita n'yo, ang unsa mang pagkinabuhi sa panimalay nga dili lig-on.

65 Ang si kinsa mang babaye nga makigminyo sa usa ka lalaki, ug unya dili siya sigurado sa maong lalaki, mas maayo pang biyaan na niya ang maong lalaki. Ug ang si kinsa mang lalaki nga makigminyo sa usa ka babaye, ug wala siya'y kasigurohan, mas maayo pang biyaan mo na lang ang maong babaye. Mas maayo nga mag-ampo sa ka og ayo, mahitungod niini, hangtud nga hatagan ka sa Dios og tubag. Ug kung ingon niana ang gihiusa sa Dios dili pagabulagon sa tawo. Mao nga kita—kita, una, kinahanglan gyud natong mag-ampo sa og ayo, mahitungod niana. Oo.

66 Karon, masayran nato nga gipaningkamotan natong kabigon ang kalibutan pinaagi sa programa pang-edukasyon, ug nagkalamukat gyud kita tungod niini, sigurado gayud. Dili n'yo mahimong kabigon ang kalibutan ngadto kang Cristo pinaagi sa edukasyon. Ginabira hinoon sa edukasyon ang tawo palayo sa Dios, labaw kay sa ginadani siya niini paingon sa Dios, tungod kay hunahunaon man niya nga mas maantigo pa siya ug mas nahibalo kaysa ni kinsa pa man. Bisan unsa pa ka maayo ang edukasyon, wala gayud gisugo ni Cristo ang Iyang iglesia sa pag-edukar sa kalibutan. Wala Niya sila gitudloan, nga maghimo og mga seminaryo. Wala Niya sila gitu- . . . Oh, maayo man ang mga niini. Wala pud Niya sila sultih nga manglakaw ug magtukod og mga ospital. Maayo man kana.

67 Apan ang buluhaton sa Iglesia mao man ang iwali ang Maayong Balita. “Panglakaw kamo sa tibuok kalibutan, og iwali ang Maayong Balita sa tanang binuhat.” Kita n'yo? Mao nga ang unsa man nga lahi kaysa niana, nagakahimong dili lig-on, tungod kay nahigawas na kana sa programa sa Dios.

68 Ang nasudnong pagkinabuhi wala pu'y kasigurohan. Bueno, wala man gyu'y kasigurohan ang kalibutan. Nagapuyo mismo kita sa usa ka kahimtang kon diin ang tibuok kalibutan nagayukbo nga nahadlok, nga daw sa, nagakahadlok ang tanan. Ang matag nasud, ang matag usa, ang usa nagakahadlok ngadto sa usa pa. Nagahisgot sila mahitungod sa kalinaw.

69 Sila kaniadto, usa ka higayon, miingon sila, “Oh, kaniadtong nakig-away kita sa Nahaunang Gubat Pang-kalibutan, ang tanan natong mga kalalaken-an gikinahanglan nga moadto didto, ug mao kadto ang magpahunong sa mga gubat.” Aba, wala pa gani napalid diha sa kahanginan ang aso sa mga armas atua na pud sila sa usa na usab ka gubat.

70 Dayon nagkaaduna sila og League of Nations, ug mao kono kadto ang magabantay sa kalibutan, pero napakyas ra kadto. Karon aduna na sab sila og U.N., ug mao ra kini gihapon. Napakyas kini. Wala man gud kana'y pulos.

71 Ang tanan na dili gyud kasaligan; ang nasudnong pagkinabuhi, ang pulitikanhong pagkinabuhi, ang mga

makinarya sa pagbotar. Oh, my! Ang mga niini gayud... Ang tibuok butang natay-og gayud, ang tanan-tanan.

⁷² Karon gusto kong dalhon kini nga mas duol kanato. Kita n'yo? Ang pang-simbahang pagkinabuhi natay-og na ug walay kasigurohan. Karon, mao kana ang ginasulti ni Pablo. Kita n'yo? Mao kana'y iyang buot ipasabot, "Kung ang usa ka trumpeta nagatingog og dili-matino nga tingog." Natay-og na ang pang-simbahang pagkinabuhi. Ang mga tawo dili na halos kahibalo kung unsay buhaton. Nagaadto sila, nagabalhin-balhin gikan sa usa ka iglesia ngadto sa usa pa ka iglesia, sa pagpaninguha nga mahibaloan kung hain ang husto; bisan asa na lang, sa pagpaninguha nga makaplagnan ang tinuod, og kung asa ang husto nga doktrina. Ug adunay moabot, ug mahimo nila kining isaysay, hangtud halos ang pinakapunto sa ilang kredo, husto. Ug dayon, mahibaloan mo na lang, duna sila'y makaplagnan nga grabeng kadaut niana, hangtud nga sulayan nila ang lain na pud nga iglesia, aron tan-awon kung unsa ang kredo niini, ang doktrina. Oh, sa tanan niini, nasayran nato nga nagkabulag-bulag na kita pagkahuman, tungod niini nga mga butang, paingon sa gatusan ka nagkalainlaing mga sekta sa iglesia. Bueno, wala ko'y unsa man nga batok niana. Kana lang nga mahimo nila ang uban pang mga butang, dayon, nga ginabuhat na nila, ug sigurado nga aduna man pu'y mga maayo nga nagagikan dinha, sa kon asa man.

⁷³ Apan, nakita n'yo, dili n'yo mahimong ipahimutang ang inyong pagsalig sa pag-ingon, "Miyembro ako sa asosasyon sa mga kasimbahanang Methodist, ug ako—okey ra ako tungod kay miyembro man ko niini." "Ako—ako—miyembro ako sa asosasyon sa mga Baptist, ug okey ra ako." Dili kana mamahimo.

⁷⁴ Dili n'yo usab mahimo kon moingon mo nga "miyembro kamo sa asosasyon sa mga kasimbahanang Pentecostal." Dili kana mamahimo. Dili n'yo angay'ng buhaton kana, tungod kay dili kini ingon niana. Nasayran nato nga sa dihang ang una natong Pentecostal nga asosasyon, ang Pangkinatibuk-ang Konseho, gitukod kaniadto, wala ra gayud nagdugay hangtud nga hinay-hinay na silang mibulag *didto*, ug mibulag *dinhi*, tungod sa mga kontrobersiya, ug mga doktrina. Ug karon tan-awa n'yo kini, sa bisan asa. Kita n'yo? Nagapakita lang nga wala kini og kasigurohan. Kadtung mga nagasalig lamang sa organisasyon, kana'y—wala kana'y kasigurohan.

⁷⁵ Karon, moingon mo, "Igsoong Branham, ginabutang mo kami sa malisud nga kahimtang dinhi. Nagahulagway ka og mangitngit kaayo nga esena." Ug gituyo ko mismo nga buhaton kana. Gusto ko kining buhaton.

⁷⁶ Gibuhat ko kini para sa usa ka katuyoan, aron mahimo kong isulti kini. Aduna ba'y butang nga sigurado? Oo. Adunay usa ka butang nga sigurado. Oh, malipayon kaayo ko tungod niana, nga

aduna gyu'y usa ka butang nga mapahimutangan mo sa imong pagsalig, ug makasigurado nga kini'y husto. Oh, pag wala na ang tanan nang uban pa, *Kini* magapabilin sa gihapon. Kung inyong basahon ang San Mateo 24:35, miingon Siya, "Ang mga langit ug yuta mangahanaw, apan ang Akong Pulong dili mapakyas." Ang Dios aduna gyu'y sigurado nga pundasyon.

⁷⁷ Usa ka tigulang lalaki, ang miingon usa niadto ka higayon, usa ka itum nga tigulang didto sa Habagatan. Aduna siya'y dala nga Biblia, ug dili siya makabasa. Ug miingon sila, "Nganong nagadala-dala man ka niana, Sam?"

⁷⁸ Ingon niya, "Kini'y—kini ang Balaang Biblia." Miingon, "Nahisulat na kini Dinhi." Ug miingon, "Ginatooan ko Kini, sugod sa unang hapin hangtud sa kaulahiang hapin, ug ginatooan ko pati ang hapin Niini," ingon niya, "tungod aduna ma'y 'Balaang Biblia' nga nakasulat niini."

⁷⁹ Ug ang tawo nga nagapakig-istorya sa iyaha, miingon, "Nagatoo diay ka nga anaa na tanan Dinha?"

Miingon, "Oo, sir. Nagatoo gayud ako."

⁸⁰ Miingon siya, "Karon, bueno, buot mo bang ipasabot nga buhaton mo ang bisan unsa nga gisulti sa Biblia nga pagabuhaton?"

Ingon niya, "Oo, sir."

⁸¹ Miingon, "Unsa kaha kung giingon niana nga Biblia nga kinahanglan molukso si Sam lusot nianang paril *nga* bato dinha? Unsa ma'y buhaton nimo?"

Ingon pa niya, "Molukso ako."

⁸² Ingon siya, "Bueno, karon, unsaon mo man paglusot sa paril nga bato nga wala ma'y bangag dinha?"

⁸³ Ingon niya, "Kung giingon sa Biblia nga molukso si Sam, nan magkaaduna gyud og bangag dinha pag nakadangat na si Sam dinha." Busa, kana, husto gyud kana. Magkaaduna gyud og bangag didto.

⁸⁴ Ang butang lamang nga kinahanglan mong buhaton mao ang mobarug sa Pulong sa Dios, ug ang Dios na ang magbuhay og paagi para sa uban pa. Oh, kanang gamhanang Pundasyon!

⁸⁵ Nagatoo ko nga miingon Siya, dinha sa Lucas, nagatoo ko nga dinha, kon diin pagpanaug gikan sa bukid, miingon Siya sa mga tinun-an, "Sumala sa sulti sa mga tawo kinsa man kono Ako nga Anak sa tawo?"

Ug may usa nga miingon, "'Si Jeremias,' ug 'ang mga propeta,' ug uban pa."

Ug miingon Siya, "Apan unsa ma'y sulti ninyo kung kinsa Ako?"

⁸⁶ Mao kadto ang higayon nga gisulti ni Pedro kadtong halangdon nga pahayag, “Ikaw mao si Cristo, ang Anak sa buhi nga Dios.”

⁸⁷ Miingon Siya, “Bulahan ikaw, Simon, nga anak ni Jonas, kay wala kini gipadayag kanimo sa unod ug sa dugo. Apan ang Akong Amahan nga anaa sa Langit ang nagpadayag niini kanimo. Ug ibabaw niining bato pagatukoron Ko ang Akong Iglesia, ug ang mga ganghaan sa hades dili gayud makabuntog Niini.”

⁸⁸ Unsa man kini kung ingon niana? Ibabaw sa gipadayag nga kamatuoran mahitungod sa Pulong sa Dios. Kay, “Sa sinugdan mao na ang Pulong, ug ang Pulong kauban sa Dios, ug ang Pulong mao ang Dios. Ug ang Pulong nahimong unod, ug nagpuyo ipon kanato.” Ug gikapadayag kadto kang Pedro nga kadto mao ang gipanghimatud-an nga Pulong sa Dios. Amen.

⁸⁹ Mao nga makaingon Siya, “Kinsa ba ang makahukom Kanako og silot tungod sa sala? Kinsa man ang makapasangil Kanako? Ang tanan man nga nahisulat sa Pulong mahitungod Kanako, gipamuhat Ko kini.” Gipanghimatud-an kini sa Dios, nga Siya mao ang Pulong. Oh, mao gayud. Ang Dios nga napadayag, mao gayud ang ginaingon sa Pulong, ug pagkahuman ginahimo kini nga tinuod sa Dios, ginapahitabo kini, og ginapakita kini.

⁹⁰ Daghan nang mga tuig ang milabay, kaniadtong miingon sila sa iglesia, “Wala ma’y ingon nianang butang nga sama sa bautismo sa Espiritu Santo, usa lang kana ka emosyon diin nadala ra niana ang mga tawo,” apan kadtong mga nakadawat Niini, nasayod nga tinuod kadto. Nasayod sila nga tinuod gyud ang Dios. Ug napamatud-an, hangtud, sa karong panahon, nga ang Pentecostal nga paglihok sa Dios sa mga kanasuran, nagdala og mas daghan ngadto kang Cristo kay sa tanang uban pa kanila.

⁹¹ Ngani ang *Our Sunday Visitor*, dili pa lang dugay, ang maong mantalaan sa Katoliko, miingon, nagatoo ko nga niadtong tuig pa kini sa wala pa kadtong miagi, o niadtong miaging tuig, mismo, nga, “Ang iglesiang Katoliko nakarehistro lamang og tunga sa milyon ka mga nakabig. Samtang, ang mga Pentecostal nakarehistro og usa ka milyon, og lima ka gatus ka libo.” Amen.

⁹² Unsa man kini? Kini’y usa ka nagatubo nga butang, ang Pulong sa Dios, nga nagakaylap. Daw sa unsa kita ka angay nga magpasalamat! Ingon na ka daku ang pagkaylap niini, hangtud nga, bisan sa karon ang mga Episcopalian, mga Presbyterian, mga Lutheran, ug tanan na, nanagduol na aron makadawat Niini. Mamatikdan ninyo kini diha sa panagtigum sa Business Men, madungog n’yo sila nga maghisgot sa nagkalainlaing mga pundok: ang Episcopalian, Lutheran, Presbyterian. Aba, panagsa ra kaayo ninyong madungog ang usa ka Pentecostal nga nagabuhat og unsa pa mang butang. Tinuod kana. Kini’y tanan

nang uban pa. Tungod ngano man? Nakita na man gud nila ang kahuyang sa ilang mga kreda, ug namalik sila sa Pulong. Dinha kamo makakaplag og usa ka pundasyon, usa ka butang nga dili matarug.

⁹³ Makaplagan n'yo dinha, ang Balaang Espiritu nga ginakinabuhi ang Iyang Kinabuhi diha sa mga tawo, og ginapadayag ang Iyang Kaugalingon ngadto sa kalibutan. Ug ginapauhaw ang mga tawo Kaniya: nga dili matay-og, dili malalis, ang Pulong sa Dios nga napadayag ug ginapakita ang Iyang Kaugalingon, ang Pulong Mismo nga ginakinabuhi pinaagi sa kinabuhi sa tawo. Pagkaanindot nga butang! Wala gyu'y unsa man nga dili-sigurado mahitungod niana. Makita ninyo kon asa nagsaad ang Dios, ug ania kini ingon nga nahipadayag. Ngani gatusan na ka mga katuigan ang milabay nga naghigsot ang mga propeta mahitungod niini, ug ania makita nato nga nagakahitabo na kini.

⁹⁴ Taliwala sa tanang kritisismo, sa tanan nga mga panagkalahi, sa tanang mga kreda, nga giyatak-yatakan nila ang Pulong sa Dios! Kung sa unsang paagi nga gisulayan nilang ipuli ang edukasyon. Gisulayan nilang ipuli, ang pagtukod og denominasyon. Gilibog ra nila ang ilang mga kaugalingon. Ug sa tanan niana, ang Pulong sa Dios nagapabilin gihapon nga ingon gayud ka hayag ug nagadan-ag sa kanunay. Unsa man kini? Kini mao kanang butang nga sigurado. Miingon ang Dios, "Ang mga langit ug yuta pareho nga mangahanaw, apan ang Akong Pulong dili mapakyas." Kung ingon-niana, mao kana ang butang nga sigurado. Kung gitinguha n'yo nga ipaangkla ang inyong kaugalingon, nan iangkla kana nga Pulong diha sa kinasuloran sa inyong kasingkasing.

⁹⁵ Miingon si David nga gitipigan niya Kini sa iyang kasingkasing, aron dili siya makasala. Gisulat niya ang mga kasugoan sa Dios sa poste sa iyang higdaanan, ug gihigot ang mga niini sa iyang mga kamot ug sa bisan asa, ginapahimutang sa kanunay ang Iyang Pulong sa atubangan niya. Ingon niana gayud. Isentro n'yo ang inyong hunahuna kanunay. . .

⁹⁶ Gisultihan sa Dios si Josue, "Ayaw pagtipas ngadto sa tuo ni ngadto sa wala, palayo Niini. Sa ingon niana ikaw magmauswagon sa imong panaw. Dayon makab-ot mo ang kauswagon."

⁹⁷ Ug pag ang iglesia bug-os nang nagkahiusa palayo sa mga kreda niini, ug anaa na sa Pulong sa Dios, kung ingon-ana makab-ot gyud sa iglesia ang kauswagon. Kana ang butang nga magayatak sa komunismo.

⁹⁸ Unsa ba ang nagpahimo sa komunismo nga...? Ang mismong butang, mahunahuna ninyo ang "komunismo," sa diha nga ginapakaylap nila ang ilang propaganda, ug paspas nga nagalambo, sa minilyon, ug gikahadlokan kini sa mga tawo:

pero kanang komunismo mahanaw ra ug mamatay. Sigurado gayud. Ang komunismo, mahimo nilang buhaton ang *ingon-ani*. Mahimo nilang buhaton ang *ingon-ana*. Nagatoo ako nga gamiton kana sa Dios, pero, tinuod kana, sama lang sa Iyang gibuhat kang Nabucodonosor kaniadto. Pagalaglagon Niya, ang—ang—ang . . . ang tanang mga bunglayon, papason, pinaagi sa komunismo. Apan, kana . . . Dili, tapos na man tã niana. Apan, matikdi. Ug ang maong butang, ang komunismo, magkaaduna man og katapusan. Modangat ang komunismo sa katapusan niini.

⁹⁹ Apan ang Pulong sa Dios walay katapusan, tungod kay wala man Kini'y sinugdan. Amen. Kini'y Eternal kauban sa Dios. Ug kung nakaangkla na kamo, ug ang Pulong nakaangkla na diha kaninyo, nan Eternal kamo kauban sa Dios. Amen.

¹⁰⁰ Siguradong modangat kini sa katapusan niini. Ang tanan nianang mga butanga nagakatay-og na. Bisan unsa pa ka daku ang haligi nga ilang ginatukod, siguradong mahugno gyud kana. Ang tanang butang nga dili iya sa, nga batok sa Pulong, o sukwahi niini, kinahanglan nga mohawa. Kinahanglan nga mopadaplin kana, tungod kay madaugon nga nagaabot ang Pulong. Walay unsa man ang makapahunong Niini. Tungod human na man nga gisulti sa Dios.

¹⁰¹ Pag isulti Niya Kini, ang mga langit ug yuta mangahanaw, apan dili gayud Kini mapakyas. Itago kana nga Pulong diha sa kinasuloran sa inyong kasingkasing, tipigi kana nga Pulong ug patuboa Kini. Ipapabilin Kini sa inyong hunahuna, sa kanunay, tungod kay dili gayud Kini mapakyas. Dili gyud mapakyas ang Pulong sa Dios, tungod kay miingon man Siya nga dili Kini mapakyas. Busa gusto natong ipapabilin kini nga ingon niana.

¹⁰² Bueno, giingon ni Pablo, diha sa mga Kasulatan, ang sama sa pagbansay sa usa ka sundalo, sa usa ka sundalo ngadto sa usa ka tingog. Karon, gikinahanglan nga matun-an sa usa ka sundalo ang mga tingog sa iyang . . . sa korneta o sa trumpeta. Kay kung dili niya mahibaloan kung ang trumpeta nagatingog na, nagabudyong na, unsaon niya pagkahibalo kung—kung mosulong na ba o kung moatras na. Kung wala siya mahibalo sa kalahian niini, nan unsa kaha nga matang sa nangalibog nga kasundalohan ang aduna kamo? Sigurado gayu'ng modaug ang kaaway diha sa usa ka grupo sa mga sundalo nga wala nabansay og ayo. Amen.

¹⁰³ Mao kana'y problema sa atong mga kaiglesihan sa karong panahon. Gibansay nato sila sa mga kredo, nga managlahi sa usa'g usa.

¹⁰⁴ Gikinahanglan natong mahiusa. Kinahanglan nasayod kita kung unsa ang trumpeta. “Kung ingon-ana unsa man ang trumpeta?” moingon sila. Ang Ebanghelyo nga trumpeta, mao

Kana. Ang Pulong sa buhi nga Dios mao ang Trumpeta. Ayaw n'yo Kini sagoli og bisan unsa man.

¹⁰⁵ Ayaw n'yo pasagdi nga adunay magtugtog og usa ka Silindron, ug magtugtog pud ang laing usa og usa ka korneta. Tungod wala na'y mahibalo kung unsay buhaton. Maghinungdan kana og pagkalibog.

¹⁰⁶ Ug naghisgot kaniadto si Pablo mahitungod sa pagbansay sa usa ka tawo para sa usa ka tingog. Ug kung unsa man ang maong tingog, eksaktong mahibalo na siya kung unsay pagabuhaton, tungod ang magbubudyong aduna ma'y mga sugo, nga gikan sa punoang kapitan. Ug kon patingogon na niya kining trumpeta, eksaktong mahibaloan sa mga sundalo kung asa—kung asa mosulong, ug kung asa moatras, ug kung moliko ba pa-tuo o pa-wála, o kung unsay pagabuhaton, pinaagi ra sa pagpatingog sa trumpeta.

¹⁰⁷ Karon, ang kasundalohan, ang gubat, aduna na gyu'y gubat sa una pa. Wala kita nagpamiyembro sa Iglesia, o misulod sa Iglesia, para moadto sa usa ka pagpiknik-piknik. Kinahanglan natong maamgo nga nagapaingon kita sa usa ka natad sa panggubatan.

¹⁰⁸ Wala ako mianhi para pikpik-pikpikon ko sa likod sa mga tawo ug moingon, “Igsoong Branham, usa gyud ka ka maayo kaayong tawo.” Dili, sir. Kondili nagaadto ko didto nga may sul-ob nga taming. Dili ra taming ang kinahanglan ko para niana. Nagaadto ako nga may puthaw'ng sarok ug hinagiban. Nagaadto ako aron makig-away, pakig-awayan ang matag pulgada sa maong yuta.

¹⁰⁹ Gisultihan sa Dios si Josue, “Ang tanang dapit nga pagatumban sa lalalapa sa inyong tiil, kana gihatag Ko kaninyo.” Busa, ang mga paglakang nagakahulogan og pagpanag-iya.

¹¹⁰ Ug pagmoabot na ang iglesia sa punto, nga nagapakig-kompromiso na kini sa mga kredo, ug ginakompromiso na ang Pulong, ug nagapakig-kompromiso na sa kalibutan, ang buot kong ipasabot, kung ingon-niana nagakapildi na kini. Nagaatras na kini.

¹¹¹ Ang gikinahanglan nato karong gabhiona mao ang mga sundalo nga manag-iya sa matag Balaan nga saad niining Biblia, nga gikasaad na sa Dios para sa Iglesia, nga sul-ob ang ang tibuok hinagiban sa Dios, ug aron mobarug. Mao kana ang gikinahanglan nato, mga sundalo; dili nga magkaaduna og usa ka uniporme para sa pang-parada, lahi ra kana. Pag ang usa ka tawo . . .

¹¹² Sa bisan unsa man nga nasud, aduna kita'y mga maniniid sa matag nasud. Adunay mga maniniid sa Germany dinhi sa ato. Adunay Ingles nga mga maniniid dinhi sa ato. Aduna kita'y—aduna pud kita'y mga maniniid didto sa Inglatera. Unsa man

ang ginapaningkamotan nilang buhaton? Ginapaningkamotan nilang hibaloon kung unsa nga matang sa materyales, kung unsa nga matang sa bomba, ang anaa sa usa pa ka nasud. Ang F.B.I. halos anaa na gud sa matag nasud. Nagabantay sila, aron manghibalo. Sa ingon-anang paagi sila nabuhi. Nagabantay sila ug ginahibalo kung unsa nga matang sa bomba ang anaa sa usa pa ka nasud. Dayon mobalik sila ug himoon kining mas arang-arang, o kaha maghimo og usa ka butang aron batokan kini. Wala sila'y pagsalig sa usa'g usa, ang mga nasud, tungod nagapakita kana nga nagakahadlok ang mga nasud. Aba, bombahan gyud ta sa Inglatera, sulod sa usa ra ka oras, kung kontrahon nato sila, o kaha kita ang mobomba kanila. Usa ra ka tawo ang gikinahanglan nga mangulo sa maong butang didto, nga moinom diyutay og makahubog, o ingon ka daghan, o nasuko ra sa kung unsa, ug dayon mao na.

¹¹³ Dinhi dili pa lang dugay, pagmoingon sila, pagmay usa ka gamay'ng baligya, "Ginama sa Japan," kaniadtong panahon sa gubat. Ila kining ibalibag sa salog, ug tamak-tamakan, ingon nga makiyutawhanon. Ug karon mobayad man gani kamo og mas daku nga kantidad para niini kaysa unsa man nga ginapalit ninyo dinhi sa nasud. Unsa ma'y nahitabo? Mabayaran ba niana ang mga kinabuhi niadtong mga kalalaken-an nga nangamatay didto? Dili gayud.

¹¹⁴ Unsa man kini? Dili ko igsapayan bisan unsa pa ang inyong pagpakig-away tungod sa mga materyal nga butang, moadto man kamo, wala kana nagkahulogan ni usa ka butang. Mapukan gihapon kana. Apan adunay pagpakig-away nga mahimo n'yong pakig-awayan ug makaangkon og kadaugan nga dili na gayud mabakwi gikan kaninyo. Kana mao ang pang-Ebanghelyong tingog sa Trumpeta nga iya sa Pulong sa Dios, ug mapanag-iya ang mga gasa ug mga saad nga Iyang gikahatag sa Iglesia. Sigurado gayud. Bueno, nahibaloan nato—nahibaloan nato, ang pagpatingog sa niini nga trumpeta.

¹¹⁵ Karon, gapaningkamot ang matag nasud nga armahan ang ilang mga kalalaken-an og pinakamaayong hinagiban nga maangkon nila. Bueno, kabalo ko, nga dili sayon ang pagdala niini nga mga hinagiban usahay.

¹¹⁶ Aduna ko'y igsoon, "Rookie," ang tawag nila sa iyaha, nga nakatambong na dinhi, ug gihatagan siya sa kasundalohan og usa ka bag nga nubenta ka libra ang kabug-aton nga karga-karga niya sa iyang likod. Ug halos pareho ra kadto sa iyang kabug-aton. Gihatagan pud nila siya og pala, para sa pagbangag; usa ka riple, ug daghang mga granada. Ug, oh, wala pa ko nakakita og ingon niadto nga bagahi! Halos dili na gud makalihok ang batan-ong lalaki. Ug gidala nila siya didto sa dalan para sa lima-ka-milya nga paglakaw. Mora siya og patyon niadto. Ingon siya, "Para sa unsa ba kining walay-pulos nga butang? Para sa unsa ba nga magkinahanglan pa ko

niining pagkadaku nga salukot?” Karon, tan-awa n’yo. Nasayod man ang kasundalohan nga magkinahanglanon siya niadto sa umaabot nga panahon. “Para sa unsa ba nga magkinahanglan ko og pala, dinhi sa dalan, samtang galakaw?” Mas maayo nga maanad ka na niana. Tingali’g magkinahanglan ka niana.

¹¹⁷ Hinoon dili man mohatag ang gobyerno og unsa mang butang gawas kon kabalo ka...nasayod sila nga magkinahanglan ka niana. Mao nga kinahanglan nimong magbansay para niana. Nagapangita baya sila og pinakamaayong butang nga makita nila, aron sa pagprotektar kanimo, tungod aduna man sila’y kahingawa sa nasud. Aduna sila’y kahingawa nga maprotektahan ka sa pinakamaayo nga mahimo nila para ikaw, mapanalipdan sa mga bala. Ingon na niana sa una pa.

¹¹⁸ Nagsugod kini kaniadto pa sa tanaman sa Eden. Ug ginabansay sa Dios ang Iyang Iglesia. Ug ang...

¹¹⁹ Kabalo mo, kinahanglan man gud kita mag-uswag sa kanunay. Ngani, ang mga karaang eroplano nga ginagamit nato kaniadto sa Nahaunang Gubat Pang-kalibutan; sa Ikaduhang Gubat Pang-kalibutan, grabe, wala na kadtong mga gagmay’ng knocker sa kawanangan, sa dihang nakagama na sila niining maanindot og dagkung super nga mga eroplano nga aduna sila. Grabe, wala na’y pulos ang mga niadto. Ug ngani, kadtong mga gipanggamit nila niadtong kaulahiang gubat, dili na kadto mahimong gamiton sa karon. Dili na nila kinahanglan ang mga niini. Aduna na sila og mga jet. Ug, kita n’yo, kanunay kamong gapaningkamot nga mouswag, aron palamboon pa ang maong butang para pang-panalipod.

¹²⁰ Apan kabalo ba mo kung unsa? Dili na kinahanglan sa Dios nga mouswag pa. Gihatag na sa Dios sa Iyang mga anak, sa Iyang mga sundalo, ang pinakamaayo nga butang nga maihatag kanila. Sa dihang gihatagan Niya sila, unsa ma’y Iyang gihatag kanila? Gihatag Niya kanila ang Iyang Pulong didto sa tanaman sa Eden, ug kinahanglan panalipdan sa tawo ang iyang kaugalingon diha sa luyo sa Pulong sa Dios, ug para walay yawa nga makaduol kaniya. Basta magpabilin lang gyud sa Pulong.

¹²¹ Bueno, ang kaaway nga maniniid, si Satanas, naningkamot nga hibaloon kung unsay mahimo niyang buhaton aron makasulod didto. Ug siya—nasayod man siya nga dili siya basta na lang makatungha ug limbongan ang babaye, busa ang bugtong butang nga mahimo niya mao ang danihon ang babaye pinaagi sa pagpangatarungan. Ug ang ginagamit sa Dios karong panahona, aron mapanalipdan ang Iyang Iglesia, mao ang Iyang Pulong. Ug si Satanas nagaabot pud nga gamit ang gahum sa pagpangatarungan. Nasayod si Satanas nga mao kadto ang lutsanan. Kadto mao ang bahin nga pinakasayon nga sudlon ang mga tawo, mao’y sa pagpangatarungan.

¹²² Moingon mo, “Karon, pasagdi lang kong mangatarungan kanimo. Bueno kinahanglan ba gyud kini?”

¹²³ Kung miingon ang Dios nga kinahanglan kini, kinahanglan gyud kini, bisan pa kung kinahanglan natong mohilak, ug motiyabaw, ug buhaton ang tanan *niini*. Kung miingon ang Dios nga kinahanglan ang bautismo sa Espiritu Santo, nan dili ko igsapayan kung unsa man Kini ka bug-at, ug kung unsa pa ka daku sa kalibutan ang kinahanglan n’yong isurender, kinahanglan ninyo Kining gamiton, usa sa niining mga adlaw, aron magpabilin nga buhi. Ang bugtong paagi para makalingkawas.

¹²⁴ “Karon, angay pa ba natong ipamuhat ang Balaanong pagpang-ayo, ingon nga aduna na man kita’y pinakamaayo nga mga doktor sa kalibutan?”

¹²⁵ Gihatag sa Dios kaninyo ang Balaanong pagpang-ayo tungod nasayod man Siya nga gikinahanglan n’yong gamiton kini. Gihatag pud Niya sa inyo ang mga gasa sa Espiritu.

¹²⁶ Ug sa dihadiha nga nakaduol na si Satanas kang Eva, misugod na siyang mangatarungan kaniya. Ania, “Sigurado, sigurado gayud, nga dili buhaton sa Dios ang *ingon-ana*.”

¹²⁷ Nagaingon ang mga tawo sa karon, “Wala ma’y ingon-anang butang nga sama sa impiyerno.” Daghan kanila ang nagasulti kaninyo niana. Kita n’yo? “Oh, sigurado gayud nga dili pagasunogon sa Dios ang Iyang mga anak.”

¹²⁸ Sigurado bitaw, dili Niya sunogon ang Iyang mga anak. Kondili ang yawa mao’y mosunog, sa mga iyaha. Kang kinsa ba kamong anak? Mao kana ang sunod nga butang. Ang impiyerno gibuhat man para sa yawa ug sa iyang mga anak, dili sa mga anak sa Dios. Wala gyud ni usa man kanila ang mapaingon didto. Husto. Nagadepende ra kung kang kinsa kamong anak.

¹²⁹ Bueno, gihatag sa Dios kang Eva ug Adan ang Iyang Pulong, ug wala gayud Niya giusab Kini. Aduna Siya sa una pa. . . Ang Cristohanon, o ang magtotoo, ang iyang Panalipod mao ang Pulong.

¹³⁰ Ang mga langit ug yuta mangahanaw. Mahanaw ang matag kredo. Mapakyas ang matag denominasyon. Maunlod ang matag nasud. Apan ang Pulong sa Dios magapabilin gayud, sa Walay Katapusan. Moabot ang panahon nga dili na modan-ag ang bitoon sa kabuntagon. Moabot ang panahon nga dili na modan-ag ang adlaw, ug dili na modan-ag ang bulan, ug dili na motuyok ang kalibutan diha sa orbit niini.

¹³¹ Apan ang Pulong sa Dios magapabilin gayud nga mao ra sa gihapon hangtud sa kahangturan. Oo. Mao kana ang usa ka butang nga dili matarug, usa ka butang nga inyong masaligan. Sigurado kini. Kon mosulti ang Dios og bisan unsa man, sigurado gyud kini nga mahitabo.

132 Kung miingon Siya, didto sa tanaman sa Eden, alang sa usa ka Manunubos, igapadala Niya ang Mesias, nan sigurado kini nga moabot. Bisan pa og upat ka libo ka tuig silang nanaghulat, apan miabot gyud Siya didto. Gikinahanglan Niyang moabot tungod kay usa kadto ka gikasaad nga Pulong sa Dios.

133 Gisaad na sa Dios nga ipadala Siya pag-usab. Moabot gyud Siya dinhi. Dili ko igsapayan kung unsa man ka daghang mga dili-magtotoo ug mga maduhaduhaon ang managpanungha, kung unsa man ang ginabuhat nila, bisan unsa na ang pagkaylap sa komunismo, moabot gyud si Jesus Cristo, ug pagakuhaon ang usa ka Iglesia nga hinugasan-sa-Dugo, ug pagadalhon Kini diha sa usa ka pang-kawanangan nga pagbiyahe paingon sa Langit. Ngano man? Tungod sigurado man kini nga mahitabo. Mao kana ang ginaingon sa Pulong sa Dios.

134 “Kung mahimo mong toohan, ang tanang butang mamahimo.” Sigurado kana. Mao kana ang giingon sa Dios, ug dili kana matarug, dili matay-og. Mao kana ang giingon sa Dios, kung magpabilin lamang kamo niini (Karon . . .) ug magmaaduna og pagtoo niini, toohan kini.

135 Dili kini usa ka tingog nga dili-sigurado. Dili magahatag ang Dios og usa ka tingog nga dili-sigurado. Mohatag ang mga kredo og dili-sigurado nga tingog. Makawali ang mga denominasyon og dili-sigurado nga tingog. Apan ang Dios dili gyud magpatingog og dili-sigurado nga tingog. Ug kini nga Pulong mao ang Dios. Ug walay bisan unsa man nga walay kasigurohan bahin Niini. Sigurado gayud ang matag tipik Niini.

136 Karon, ang halangdong Iglesia armado gayud sa Pulong. Bueno, kaniadtong mianhi si Jesus, gigamit ba Niya ang mao gihapon nga hinagiban? Gigamit Niya mismo.

137 Kaniadtong miduol Kaniya si Satanas, sa tibuok niyang kusog, ug miingon kini, “Kung Ikaw mao ang Anak sa Dios, buhata ang *ingon-ini*, *ingon-ana* nga mga butang.”

138 Miingon Siya, “Nahisulat na . . .” Nagabalik mismo sa Pulong. Gisulayan Siya ni Satanas sa mas hataas pa. Apan, si Jesus, nagabalik ra mismo sa Pulong, “Nahisulat na . . .”

139 Dinha Siya nagpabilin, sa ibabaw nianang Pulong, ginapakita kanato ingon nga usa ka panig-ingnan. Maingon sa Iyang gisulti sa Unang Mga Taga-Corinto, una . . . San Juan 14:13, “Ako nagahatag kaninyo og panig-ingnan.” Ug usa kana ka panig-ingnan, nga kita sa walay pagduhaduha, angay natong bug-os gyud nga ipahimutang ang atong pagsalig diha sa Pulong sa Dios. Ingon nga ang tanang uban pa bakak. [Blangko nga bahin sa teyp—Ed.]

140 Kana ang usa ka butang nga sigurado. Ingon nga nagsaad ang Dios. Tumanon gyud sa Dios ang maong saad. Moingon sila, “Unsaon man pagkahitabo *niini* nga butang? Unsaon man Niya paghiusa ang usa ka pundok sa mga tawo, pinaagi sa

Makasakgaw nga grasya, aron mokayab?” Wala ko kahibalo kung unsaon Niya pagbuhat kana. Dili ko na buluhaton nga ipangutana pa kung unsaon Niya pagbuhat kana. Ang buluhaton ko mao ang mamahimo lamang nga andam para niana. Gisaad Niya kana. Mao nga mahitabo gyud kana. Gipanalipdan Niya ang Iyang Iglesia pinaagi sa Pulong.

¹⁴¹ Ug ang unang butang mao ang pagpangatarugan. Karon moingon sila, “Dili ba makatarunganon man karon, nga kung miyembro ako sa *niini* nga iglesia, dili ba pareho ra kana ka maayo sa *niana* nga iglesia?”

¹⁴² Aduna lamang og usa ka Iglesia nga mamahimo kamong kabahin. Wala kamo nagapamiyembro Niini. Mahimo kamong magpamiyembro sa kapunongan, sa Methodist nga kapunongan, ug sa Presbyterian nga kapunongan, ug sa Baptist nga kapunongan, ug sa Pentecostal nga kapunongan. Apan natawo kamo sa Iglesia ni Jesus Cristo, og mao kana ang Iglesia.

¹⁴³ Mga kapunongan ra ang mga niana, kon diin nagakatigum ang mga tawo, sama sa mga uwak nga nagatugdon sa *niini* nga sanga, ug ang mga salampati sàb sa *nini* nga sanga, ug—uban pa. Mao kana ang inyong pagpakig-fellowship ingon nga magkauban kamo, sa diha nga nagaambit kamo sa mao ra nga pagkaon.

¹⁴⁴ Apan paghisgotan na ang bahin sa Iglesia ni Jesus Cristo, aduna lamang og usa ka agianan. Kana mao ang pagkahimugso. Pagkahimugso!

¹⁴⁵ Sama lang kini sa usa ka tawo, sa gikaingon ko na sa makadaghang higayon, sama sa usa ka itum nga langgam nga nagatugdon sa sanga, nga naningkamot nga magbutang og mga balhibo sa pabo diha sa iyang mga pako, ug nagaingon, “Nakita mo, usa gyud ako ka tul-id nga pabo.” Kita n’yo? Gibutang ra niya kadto nga mga balhibo, diha sa iyang kaugalingon. Pero kung usa siya ka tinuod nga pabo, nan sa kinaiya na niya mismo nga magpagawas og ingon-niana nga matang sa balhibo.

¹⁴⁶ Kung ang Iglesia sa buhi nga Dios mao gayud ang Iglesia sa buhi nga Dios, igapamunga Niini ang Pulong sa buhi nga Dios. Dili mo na kinahanglan magdugang og mga balhibo sa pabo sa bisan asa man. Tungod ang matag balhibo nga anaa dinha iya man mismo sa usa ka pabo. Mahimo n’yo kanang toohan. Ug ang matag balhibo nga nahiusa sa Iglesia sa Dios mao gayud ang Pulong sa Dios. Dili siya magpasulod og bisan unsa man gawas sa Pulong. Amen. Kay, ang kinaiyahan sa Espiritu nagapagawas lang man og Pulong. Amen. Hinay-hinay ko nang gibati ang pagkarelihiyoso. Tinuod.

¹⁴⁷ Dili kini unsa mang butang nga ginapaningkamotan n’yong buhaton, unsa mang butang nga gihimo-himo n’yo lang. Dili kamo puedeng maghimohimo og reli-. . .Dili kamo puede maghimohimo og kaluwasan. Dili kamo puede maghimohimo og

mga gasa. Kinahanglan n'yong ipamunga ang mga gasa. Mao gayud. Kita n'yo? Ang—ang karnero dili, wala siya gahimohimo og pangkarnero nga balhibo. Aduna siya'y pangkarnero nga balhibo tungod kay usa man siya ka karnero. Basta na lang nagatubo sa iyaha ang pangkarnero nga balhibo. Ang—ang—ang punoang cherry dili man nagahimohimo og mga cherry. Basta na lang kining nagapamunga og mga cherry, tungod kay ingon-ana man mismo ang kinabuhi niini.

¹⁴⁸ Ug ang Iglesia sa buhi nga Dios wala Kini ginapasulod, aron himoon ang ilang mga kaugalingon nga susama sa kung unsa man. Kondili ingon na niana kung unsa sila, tungod sa grasya sa Dios. Ug nahiusa kanila ang Pulong sa Dios, ug nahiusa pud sila sa Pulong. Ug ang mga buhat nga gipamuhat kaniadto sa usa ka hingpit, nga si Jesus Cristo, ang Dios nga nadayag diha sa unod, igapamuhat mismo pinaagi sa matag magtotoo nga natawo na pag-usab. Mao kana'y Iyang giingon. Amen. Wala na'y uban pa. Bueno, butang kana nga sigurado.

¹⁴⁹ Karon, mahimong medyo—medyo makalibog sa usa ka tawo, kung wala pa niya nahibaloan ang tinuod nga tingog sa trumpeta. Bueno, ang tawo nga wala pa sukad nabansay diha sa trumpeta, ug wala pa sukad nakadungog niini, bueno, mahimong malibog gyud siya pag makadungog siya og usa ka butang nga lahi ang tingog kumpara sa iya nang nadungog. Ang nagakadunggan niya sa una pa, “Magpamiyembro ka sa iglesia. Dalha ang imong sulat *dinhi* dapit ug *dinhi* dapit.” Mahimong okey ra kana. Tungod mao lang man kana ang iyang nahibaloan.

¹⁵⁰ Apan pag balikan na nimo, ang mahitungod sa bautismo sa Balaang Espiritu, ang paghisgot mahitungod sa gahum sa Dios ug ang mga butang nga ginabuhat Niya; ug kung sa unsang paagi nga ginahimo niini ang mga kababayan-an ug mga kalalaken-an, nga parehong, manghinlo sa ilang mga kaugalingon gikan sa pagkinabuhi sa sala; kung sa unsang paagi nga ginahimo sila niini nga magkinabuhi na nga diosnon, og matinuuron gayud. Ug ang mga butang nga ginapamuhat niini, ug ginapamunga ang bautismo, pagsulti og laing mga pinulongan, pagpang-ayo sa mga may sakit, paghingilin og mga yawa, pagpropesiya, mga gasa, oh, mga panan-awon, og tanan nang butang sa Iglesia. Alleluyah! Husto kana. Pag nagatingog kini, nan medyo makalibog kini sa ilaha nga wala pa sukad nakadungog og ingon-ana nga matang sa trumpeta.

¹⁵¹ “Bueno,” moingon mo, “ang akong iglesia wala man nagtudlo niana.” Kung ingon niana dili niini ginabudyong ang Ebanghelyo nga trumpeta. Himaya! Tinuod.

¹⁵² Apan kanila nga mga binansay nga sundalo, alleluyah, pag madungog nila kanang tingog sa trumpeta, kahibalo sila kung unsaon pagtindog nga han-ay. Sulong, Cristohanong sundalo! Himaya! Oh, kana mao'y sigurado!

“Giunsa mo man pagkahibalo nga sigurado kini?”

Anaa kini sa Pulong.

“Bueno,” moingon mo, “ang among iglesia wala man lagi nagtudlo Niana.”

¹⁵³ Apan Kini man ang ginabudyong sa trumpeta. Dili ko gusto nga mabansay sa usa ka kredo sa iglesia, tungod kay matay-og ra kana ug mapukan. Apan kung binansay ka diha sa Pulong, ang mga langit ug yuta mangahanaw, pero kining Pulong dili gayud mahanaw. Ang matag kredo, ang tanan nang uban pa, mangapukan. Apan kining Pulong dili gayud mapakyas. Amen. Mao kana ang tingog. Mao kana ang tingog nga gusto nakong madungog. Oo, sir.

“Oh,” moingon mo, “unsaon man nako pagkahibalo?”

¹⁵⁴ Miingon si Jesus, “Ang Akong mga karnero nagapatalinghug sa Akong tingog. Nakaila sila sa Akong trumpeta.” Miingon Siya, diha sa San Juan, ika-14 nga kapitulo ug ika-12 nga bersekulo, “Siya nga nagatoo Kanako, ang mga buhat nga Akong ginabuhat pagabuhaton usab niya.” Bueno, gisulti Niya kana.

Kung moingon ang usa ka tawo, “Bueno?”

¹⁵⁵ Miingon ang Mga Hebreohanon 13:8, “Si Jesus Cristo mao sa gihapon kagahapon, karon, ug hangtud sa kahangturan.”

“Oh,” moingon sila, “sa usa ka pamaagi.”

¹⁵⁶ Bueno, moingon ang usa ka tinuod nga karnero, “Uh-oh. Oh, may sa kung unsa nga ming-igiik, dinha. Dili kana husto nga tingog. Oh, tingali’g usa kana ka French horn. Dili kana usa ka trumpeta, tungod kay ang Biblia dili man nagahatag og dili-sigurado nga tingog.”

¹⁵⁷ Ginaingon Niini, “Madawat ninyo ang Espiritu Santo.” Dili nga, “Inyong tingali.” “Madawat ninyo, matag usa.” Hangtud kanus-a? “Hangtud sa inyong mga anak, ug sa mga anak sa inyong mga anak, ug sa tanang atua sa halayo, bisan ang kapid-an nga pagatawgon sa atong Ginoong Dios.” Pagapatingogon Niya ang trumpeta diha sa matag kaliwatan ug matag henerasyon, ug madungog nila ang Iyang Tingog. Toohan nila Kini, niadtong mga gikatagana-nang-daan ngadto sa Kinabuhi. Amen. Toohan nila Kini tungod kay nasayod man sila nga ang Ebanghelyo nga trumpeta Kining nagatingog. Dili kini ingon nga walay kasigurohan. Nasayod ang matag sundalo kung unsaon sa pagbarug.

¹⁵⁸ Bueno, nasayran n’yo sila ni Pedro, ug si Juan, si Santiago, ug ang nahaunang iglesia kaniadto, nga nagamartsa sa niini nga dalan, tungod kay ang trumpeta, si Jesus, miingon man, “Panglakaw kamo sa tibuok kalibutan, og iwali ang Maayong Balita.” Marcos 16, kita n’yo, “Kini nga mga ilhanan maganunot kanila nga nagatoo.” Makita nato sila ni Pedro, Santiago, Juan,

og ang uban pa kanila nga nagalinya, nagamartsa nga ginatuman Kana.

¹⁵⁹ Ug kita pud nagaliko sa ubang direksyon, palayo Niini? Ang usa nagasulong, ang usa usab nagaatras? Moingon ang usa, “Bueno, para man kadto sa uban. Kadto, kadto—kadto nga tingog, para man sa uban.” Oh, dili. Dili mamahimong ingon niana.

¹⁶⁰ Ang tibuok kasundalohang Cristohanon nagapatalinghug gyud sa trumpeta. Miingon ang Dios nga kadto mao ang trumpeta. Dili Niya kini mahimong usabon. Mao kana ang tingog nga Iyang giingon nga magatingog. “Tungod niini ang tanan makaila,” ug mokayab na ang Iglesia.

¹⁶¹ Ang uban kanila dili nagatoo sa Iyang literal nga Pag-abot. Pero miingon man ang Biblia nga moabot Siya, busa nagapaabot kita sa Iyang Pag-abot. Kung dili pa Siya moanhi karong gabhiona, nan magapaabot kita inig ka buntag. Kung dili pa Siya moanhi inig ka buntag, magapaabot gihapon ta Kaniya ugma sa gabii. Ug padayon ra kita nga magahulat. Kung mahikatulog man kita, ang atong—atong. . .dili kawang ang atong paghikatulog. “Kay ang trumpeta sa Dios patingogon nianang katapusang trumpeta, ug ang mga nangamatay diha kang Cristo mangabanhaw. Ug kita nga mga buhi pa ug nanghibilin pagalalinon pagtingub uban kanila, aron sugaton ang Ginoo diha sa kawanangan, ug maatua na didto hangtud sa kahangturan.” Mao kana ang tingog sa trumpeta. Kung buhi man ako o kung mitaliwan na, walay unsa man nga kalahian. Madungog ko gayud ang tingog. Mabanhaw ako. Himaya sa Dios! Mabanhaw gyud. Oh, oo. Oo.

¹⁶² Miingon si Jesus, nga, “Ang Akong mga karnero nagapatalinghug sa Akong tingog.” Siya mao ang Pulong nga napadayag. Pag ang. . .Sa ingon-anang paagi Siya maila sa Iyang mga karnero.

¹⁶³ Karon matikdi ang mga Fariseo ug ang uban pa niadtong panahona. “Oh,” ingon sila, “kining Tawhana si Beelzebub.” Sa dihang gisultihan ni Jesus ang babaye nga atua sa atabay, didto, mahitungod sa iyang mga sala, sa iyang mga bana nga nagkaaduna siya, og kaniadtong gisultihan Niya si Natanael kon asa siya, sa ilalum sa kahoy kon diin siya gitawag ni Felipe, didto sa ilalum sa kahoy’ng higuera, nga nagaampo, aba, miingon kadtong mga magtutudlo niadtong panahona, “Kining Tawhana si Beelzebub. Usa Siya ka yawa. Usa Siya ka manghihimalad.”

¹⁶⁴ Apan dili ingon niana kang Pedro, Santiago, Juan, ug sa uban pa kanila. Nasayod sila niini. Ngano man? Nasayod man sila nga miingon ang Dios nga pag moabot ang Mesias, sumala sa dinihogan nga tingog ni Moises, mamahimo Siyang usa ka propeta. Ug sa nakita nila kadtong mga butanga nga Iyang gisulti nga nadayag ug gihimong hingpit, nasayod sila nga kadto

mao'y pagkaon sa mga karnero. Nasayod sila nga kadto mao ang trumpeta. Ug misugod sila nga mosunod niadto. "Ang Akong mga karnero nakaila niini," tungod kay nakita man nila ang Pulong sa Dios nga nadayag.

¹⁶⁵ Karon, ang mga tawo pud karong panahona, dili sila nagatoo nga adunay ingon nianang butang nga sama sa bautismo sa Espiritu Santo. Anhi gani mo dinhi o sa kung asa man diin aduna sila'y Espiritu Santo, ug makita nila ang saad sa Dios nga eksaktong nagakatuman gayud, aba, "Ang Akong mga karnero nagapatinghug sa Akong tingog." Nakaila sila sa tingog nianang trumpeta tungod kay ang Biblia man kini. "Si Jesus Cristo mao sa gihapon kagahapon, karon, ug hangtud sa kahangturan." Hangtud karon Siya gihapon mao ang Mga Hebreohanon 13:8, eksakto.

¹⁶⁶ Dili ko igsapayan, karon, wala kini'y bisan gamay'ng kalahian kung unsa man kadaghang budyong sa iglesia ang nagatingog. Daghan kaayo ta og nagatingog nga mga budyong sa iglesia, kabalo mo, nga nagapatingog og kung unsa na lang, nagaingon, "Oh, ang mga adlaw sa mga milagro milabay na. Wala na ma'y ingon nianang butang nga sama sa Balaanong pagpang-ayo."

¹⁶⁷ Oh, pero ang tinuod nga mga karnero dili gayud nagapaminaw niana. Kondili nagapaminaw sila nianang trumpeta, nga sigurado.

¹⁶⁸ Mahimong motingog og bisan unsa na lang kanang budyong sa iglesia. Mahimo kamong . . . Tan-awa n'yo kung unsa ang anaa niini sa karon, mga budyong sa iglesia. Ang usa nagapaingon sa *niini* nga direksyon, ug ang usa pud nagapaingon sa *niana* nga direksyon. Ug nagalingkod-lingkod lang ang yawa, nagaingon, "Aba, nagaaway-away na sila sa usa'g usa. Ingon-ana lang. Dili ko na gani kinahanglan palihokon ang akong kamot."

¹⁶⁹ Apan, igsoon, pasagdi silang tanan nga maarmahan usa ka higayon, og mamalik sa punoang mga sugo. Oh, pagkanindot! Kung ingon niana makita n'yo ang usa ka "nagasulong, nga mga Cristohanong sundalo," mismo, nga dili nagapaminaw sa mga budyong, kondili nagapaminaw gayud sa trumpeta.

¹⁷⁰ Mohunong sa ta, kadiyut lang, ug balikan ug tan-awon ang pipila karon. Hapit na kitang mahuman, tungod kay dili ko gusto nga langanon kamo pag-ayo dinhi. Pero balikan sa nato ug tan-awon ang pipila nga nagpatinghug niini nga tingog. Atong hisgotan . . . Ug sigurado sila kaniadto. Karon, gipakita ko na man kaninyo nga ang tanang uban pa walay kasigurohan. Hisgotan sa nato ang usa ka tigulang nga tawo, sa makadiyut.

¹⁷¹ Atong hisgotan ang propetang si Job. Bueno, kadto nga tawo miagi sa usa ka pagsulay, pero nasayod siya nga ang gikinahanglan sa Dios usa ka halad-nga-sinunog. Mao kadto ang gikinahanglan sa Dios, ug mao lang gyud kadto ang

Iyang gikinahanglan. Ug bisan unsa man kadakung hitabong-dautan ang nahitabo sa iyang panimalay . . . ang Dios dili man pirming . . .

¹⁷² Pag aduna kamo'y makita nga dili maayong nagakahitabo sa usa ka tawo, wala kana nagapasabot nga ginalatigo siya sa Dios. Mahimong dili kini ingon nga wala siya sa kabubut-on sa Dios. Nasayod siya sa kinasuloran sa iyang kasingkasing kung nagapaminaw ba siya sa trumpeta o wala.

¹⁷³ Gikinahanglan sa Dios kining halad nga sinunog, ug mibarug mismo si Job niadto. Kana lang. Miingon sila, "Job, usa man ikaw ka makasasala sa tago lang. Aduna ka'y ginabuhat nga sayup." Apan nasayod gyud siya. Nagpabilin siya didto mismo, tungod kay nadungog man niya ang tingog sa trumpeta, ug nagpabilin siya mismo niadto.

¹⁷⁴ Ug, sa katapusan, didto na mismo sa kaulahian, sa dihang siya'y . . . Gibuhian na ang yawa ngadto sa iyaha, ug gikuha ang iyang pamilya, ug gikuha niini ang iyang mga anak, gikuha ang iyang mga kamelyo, ug gikuha ang tanan niyang bahandi, ug gipakunhod pa gyud ang iya mismong maayo nga panglawas. Milingkod siya sa taliwala sa mga abo. Daw sa nawala na gyud ang tanan. Apan sa gihapon miingon siya, "Nasayod ako nga ang akong Manunubos buhi. Sa kaulahiang mga adlaw Siya motindog ibabaw sa yuta. Bisan pa kon ang mga ulod sa panit magaut-ut niining lawasa, apan diha sa akong unod makita ko ang Dios." Walay unsa man nga dili sigurado mahitungod niana, dili ba? Dili nga, "Ako—ako—ako—sa hunahuna ko mora'g buhi man Siya." Ang ingon niya, "Nasayod ako nga Siya buhi, ug magatindog Siya sa kaulahiang mga adlaw ibabaw sa yuta. Bisan pa kon ang mga ulod sa panit magaut-ut niining lawasa, apan diha sa akong unod makita ko ang Dios." Oh, grabe! Nahitabo gyud kadto. Sigurado gayud siya.

¹⁷⁵ Si Abraham, nga atua nagalakaw sa umahan usa niadto ka adlaw, nadungog niya ang Dios nga miingon, "Abraham, Akong . . ." Gitagbo Niya si Abraham sa wala pa ang nasulat nga Pulong, ug miingon Siya, "Abraham, hatagan Ko ikaw og usa ka anak pinaagi sa imong asawa, si Sarah." Ug saisenta'y-singko anyos na si Sarah niadtong panahona, ug si Abraham pud setenta'y-singko na. Ug nangandam sila para niadto, ug wala siya naulaw nga magtestimonyo. Nasayod man siya nga makabaton gyud siya og anak.

¹⁷⁶ Ug miingon ang Biblia, "Wala siya nagduhaduha sa saad sa Dios tungod sa kakulang-sa-pagtoo, kondili bug-os nga masaligon." Amen. Bug-os nga nagasalig, nagapasabot kana nga natagbo niya ang pinakabasihanan. Amen. Mao kana. Ang pinakabasihanan mao ang pinakatumoy sa dalan. Mao kini ang kinatapusanng butang. Kini'y—mao na kini tanan.

Ingon siya, “Bug-os akong nagasalig nga, kung unsa man ang gikasaad sa Dios, mahimo sa Dios nga tumanon.”

¹⁷⁷ Kamo, karong gabhiona, bug-os ba kamong nakumbinsir nga kini mao ang Espiritu Santo? Bug-os ba kamong nakumbinsir, nga kini mao ang dalan? Bug-os ba kamong nakumbinsir, nga Siya’y usa ka Mananambal? Bug-os ba kamong nakumbinsir nga Siya moanhi pag-usab? Bug-os ba kamong nakumbinsir nga Siya mao sa gihapon kagahapon, karon, ug hangtud sa kahangturan? Amen. Bug-os gayud nakumbinsir! Oo.

¹⁷⁸ Maghisgot tà og usa pa, si Elias, nga atua didto ibabaw sa bukid. Nakiglantugi siya kang Jezabel ug sa pinintalan nga nawong niini, ug medyo gikapoy na siya niadto. Mahitungod sa tanang mga kababayen-an kaniadto nga nag-awat-awat na sa unang gining, tingali’g nanagpa-alut na og waterhead ug unsa man nga aduna sila niadtong panahona. Nakiglantugi siya pag-ayo bahin niadto hangtud nga—nga halos naluya na siya.

¹⁷⁹ Sa gilayon, giingnan siya sa Dios, “Umadto ka didto. Kabalo ka, nagaulan og mga duha o tulo ka adlaw kada semana, dinhing dapita. Apan atubanga si Ahab, ug sultih siya nga, ‘MAO KINI ANG GINAINGON SA GINOO. Walay tun-og nga mahulog gikan sa langit hangtud nga igasulti ko kini.’” Oh, grabe!

¹⁸⁰ Wala siya miingon, “Karon, Ahab, tingali, basin magpulos kini sa ingon niini nga paagi.” Oh, wala. Siya’y bug-os gayud nga nagasalig, ingon nga walay unsa man nga dili-sigurado kaniya. “Walay tun-og nga mahulog, walay ulan nga moabot, hangtud nga igasulti ko kini.” Amen. Himaya! Oh, ngano man? Nadungog niya ang trumpeta. Sigurado kadto. Nakaila siya sa iyang Dios. Nasayod siya nga mahitabo gyud ang usa ka butang, sa dihang gisulti sa Dios kadto nga Pulong, ang tibuok kalangitan ug yuta mangahanaw man apan kadto—kadto mahitabo gayud, sigurado gyud nga mahitabo kadto. Nagasalig gayud siya.

¹⁸¹ Bueno, ingon sa Dios, “Elias, gusto Ko nga motungas ka didto sa pinaka-mala nga lugar sa nasud, didto ibabaw sa bukid kon diin walay mga tubod. Apan aduna Ako’y usa ka tubod didto para kanimo.”

¹⁸² Bug-os siyang nagasalig. Mitungas siya ngadto sa bukid ug mipahimutang didto duol sa sapa sa Cherith. “Ug karon unsa ma’y akong buhaton dinhi?”

“Gisugo Ko na ang mga uwak sa pagpakaon kanimo.”

¹⁸³ “Karon, unsaon kaha niadtong mga uwak. . . Bueno, kadali lang, Ginoo”? Dili, dili. Mitingog na ang trumpeta. Igo na kadto. “Sa unsa mang paagi kini mahitabo? Wala ako mahibalo. Wala na ko’y labot. Kita n’yo? Dili ko na kinahanglang mabalaka bahin niana. Buluhaton na kana sa Dios. Miingon Siya nga gisugo na Niya ang mga uwak.”

184 “Bueno, Ginoo, mahimo ba nga Imong isaysay kini og ayo sa akua, ug sultihi ako kung asa gayud ang mga niini. . . kung unsa nga tulonghaan ang gieskwelahan sa mga uwak didto, aron makakat-on sila sa pagsulti og Hebreohanon? Unsa kaha nga matang sa. . . Nagaluto ba sila sa de-gas nga sud-angan, o aduna ba sila’y sud-angan pangkahoy, o unsaon man nila paghimo niini? Ug asa man sila. . . Unsa ba nga matang sa mananap ang ilang pagaihawon? Gagmay’ng langgam ra man sila. Unsaon man nila pag-ihaw og baka para sa ako, aron dalhan ako og tinapay nga may palaman nga karneng baka?” Kita n’yo? Kita n’yo? Wala na niya kadto gisusi.

185 Ang Dios, ang—ang trumpeta sa Dios, nagpahayag ang Iyang Tingog ug miingon, “Gibuhat Ko na!” (Dili nga, “Elias, tingaling buhaton Ko kini.”) “Gibuhat Ko na kini.” (“Buhaton Ko kini.”) “Gibuhat Ko na kini.” Amen.

186 Ingon-ana ang atong Dios, karong gabhiona. Dili nga, “Buhaton pa lang Niya kini.” Kondili gibuhat na Niya kini. Amen. Human na Niyang gibuhat kini. Amen. Dili nga, “Buhaton pa lang Niya; mahimo nga buhaton Niya; tingali’g buhaton Niya.” Gibuhat na Niya kini. “Gisugo Ko na ang mga uwak.”

187 Ngani gitugyan Niya ang Iyang Espiritu ngadto sa tanang katawohan. Gitugyan Niya ang Iyang mga panalangin. Mikayab Siya sa Kahitas-an, ug naghatag og mga gasa sa mga tawo. Aduna gyu’y magadawat niini. Aduna pu’y magasalikway niini. Wala na ko’y labot kung sa unsang paagi kini mahitabo. Basta mahitabo gyud kini. Miingon ang Dios nga mamahitabo kini, ug mahitabo gyud kini. Miingon si Pedro, niadtong Adlaw sa Pentecostes, “Maghinulsol kamo, ang matag usa kaninyo, ug magpabautismo sa Ngalan ni Jesus Cristo alang sa kapasayloan sa inyong mga sala, ug madawat ninyo ang gasa, ang Espiritu Santo.” Unsaon kaha pag-abot Niini? Wala ako mahibalo. “Ang—ang saad alang sa inyong mga anak, og sa tanang atua sa halayo, bisan ang kapid-an nga pagatawgon sa atong Ginoong Dios.” Karon, dili n’yo mahimong isaysay kana pahalayo. Mitingog na ang trumpeta, ug nagatoo ako niini. Gituman ko kini, ug gidawat kini. Amen. Karon bisan sulayan n’yo pang makiglantugi kanako sa makausa mahitungod niini. Amen. Oh, hinoon dili man ko hingpit. Dili.

188 Sama niadtong gabhiona, nga ang tigulang itum nga igsoong babaye, ingon siya, “Elder, puede ba kong magtestimonyo?”

“Oo, ma’am.”

189 Ingon siya, “Gusto kong isulti kining usa ka butang.” Ingon siya, “Ako—ako—ako dili pa kung unsa ang gitinguha kong mamahimo.” Ug ingon pa siya, “Ako dili pa kung unsa ako angay’ng mamahimo. Pero, usa ra ka butang ang nahibaloan ko, dili na ako sama sa kung unsa ako kaniadto.”

¹⁹⁰ Busa, kana, ingon-ana sàb ang atong ginabati karon mahitungod niana. Dili na ako sama sa kung unsa ako kaniadto, tungod kay luwas na ako karong gabhiona, tungod sa grasya sa Dios, ug nadawat na ang bautismo sa Espiritu Santo, sumala sa sugo. Gikabubo Kini didto niadtong Adlaw sa Pentecostes, ang saad nga gikahatag, ug gitooohan ko kini. Walay unsa man nga dili-sigurado. Nadungog ko mismo ang tingog. Gituman ko kini, ug sigurado ako nga ingon niana gyud kini. Mao gayud. Nasayod ako nga mao kini. Sigurado.

¹⁹¹ Si Simeon kaniadto, nga usa ka tigulang nga manggialamon nga mga otsenta anyos na ang panuigon, gatusan na ka mga katuigan sukad niadtong may usa ka propeta nga nahianhi sa yuta, pero nagkinabuhi siya nga may maayo kaayong dungog. Nagpakigsulti kaniya ang Espiritu Santo usa ka adlaw, ang ingon, “Simeon, kabalo ka, dili ka mamatay hangtud nga makita mo ang kaluwasan nga iya sa Ginoo.” Himaya!

¹⁹² Ang labaw’ng sacerdote didto mahimong, nagahapuhap-hapuhap sa iyang balbas sa pila ka higayon, ug miingon, “Simeon, kinahanglan mong sudlayon ang imong balbas sa pikas bahin.”

Ingon siya, “Wala gyud kana’y bisan gamay’ng kalahian.”

“Giunsa mo man pagkahibalo nga husto ka?”

“Mao kana ang gisulti kanako sa Espiritu Santo. Dili ako mamatay.”

¹⁹³ “Aba, Simeon, aba, ikaw...Aba, hapit na kaayo kang mamatay bisan karon mismo.”

¹⁹⁴ “Oh, dili ko igsapayan kung unsa ma’y inyong isulti. Tungod gisultihan gyud ko sa Dios nga dili ako mamatay hangtud nga makita ko ang kaluwasan gikan Kaniya. Walay unsa man nga dili-sigurado. Dili ako mamatay. Dili ako mahimong mamatay hangtud nga makita ko Siya.” Amen. Mao kana.

“Unsaon mo man paghimo niana, Simeon?”

“Ako, dili ko na kana buluhaton.”

“Asa na man Siya, Simeon?”

“Wala ako mahibalo.”

“Unsaon mo man pagkahibalo nga makita nimo Siya?”

¹⁹⁵ “Mao man ang giingon sa Dios. Mao na kana. Kini mao ang Pulong. Dili ako mamatay hangtud nga makita ko Siya.” Oh, my!

¹⁹⁶ “Oh, makaluluoy’ng tigulang nga tawo. Siyempre, giango-ango na man gud siya, kabalo na mo. Busa pasagdi na lang siya.”

¹⁹⁷ Apan nakita gyud niya Siya, bisan pa man. Oo, sir. Nagahimo ang Dios og pamaagi alang nianang mga tawo nga motoo sa Iyang Pulong.

198 Si Jesus, kaniadtong ania pa Siya sa yuta, ug atua Siya didto sa lubnganan ni Lazarus.

199 O, sa wala pa kadto, kaniadtong atua Siya sa pagpakigpulong sa—sa mga tawo, nagahisgot mahitungod sa kung unsa Siya, nga wala pa gani’y singkwenta anyos, pero miingon nga nakita na Niya si Abraham. Inyo bang namatikdan kung unsa Siya ka sigurado? Ingon Siya, “Sa wala pa si Abraham, MAO NA AKO. MAO NA AKO.” Dili nga, “Ako kaniadto,” o, “Ako sa umalabot,” kondili, “MAO NA AKO. Sigurado Ako.”

200 Dayon, miingon Siya, didto sa lubnganan ni Lazarus, sa wala pa Siya miadto didto, miingon Siya, gisultihan si Marta, ingon Siya, “Ako mao ang pagkabanhaw, og ang Kinabuhi.” Dili nga, “angay Ako,” o, “mamahimo Ako,” kondili, “Ako mao.” Amen.

201 “Ang akong igsoon, kung ania Ka lang unta, wala unta namatay. Apan bisan karon, Ginoo, bisan unsa ang Imong pangayoon sa Dios, igahatag kini sa Dios Kanimo.”

Ingon Siya, “Ang imong igsoon mabuhi pag-usab.”

202 “Oh, mabanhaw bitaw siya sa kaulahiang mga adlaw, didto na sa pangkinatibuk-an nga pagkabanhaw. Usa man siya ka buotan nga batan-on. Oo, nagatoo ako nga mabanhaw gyud siya.”

203 Pero medyo gitul-id ni Jesus ang Iyang, kaugalingon, ug, miingon, “Apan Ako mao ang pagkabanhaw ug Kinabuhi.” Dili nga, “Mamahimo Ako; angay Ako,” o uban pa. “AKO MAO.” Wala gayu’y unsa man dinha, walay unsa man nga pagduhaduha, walay pagpanagana mahitungod niana. Walay unsa man nga dili-sigurado. Kondili sigurado gyud kadto.

204 “Ako mao ang pagkabanhaw ug Kinabuhi. Siya nga nagatoo Kanako, bisan siya mamatay, mabuhi siya. Ang tanan nga buhi ug nagatoo Kanako dili na gayud mamatay.” Dili—dili nga, “Mahimong dili sila mamatay. Dili tingali sila mamatay.” “Dili gyud sila mamatay. Walay unsa man—walay unsa man nga dili-sigurado mahitungod niini. Dili sila mamatay.”

205 “Siya nga nagapatalinghug sa Akong mga Pulong ug nagatoo Kaniya nga nagsugo Kanako adunay Kinabuhing walay katapusan, ug dili na gayud Pagahukman sa silot, kondili miagi na gikan sa kamatayon ngadto sa Kinabuhi.”

206 “Dili sila angay’ng Pagahukman sa silot”? Dili na sila Pagahukman sa silot. Amen. Giako man Niya ang paghukom nga para sa ako. Mao nga wala na ko’y unsa man nga kahilambigitan dinha. Amen. Mao kana. “Miagi na gikan sa kamatayon ngadto sa Kinabuhi.” Oh!

207 Bueno miingon si Marta nga gitoohan niya kini. Karon, wala gayud miingon si Jesus, “Bueno, kabalo ka, ingon nga nagatoo ka niana, ug nasayod ka nga Ako mao ang Pulong, ug—ug Ako—

Ako. . . Nasayod ka nga Ako mao Siya nga moabot. Gipahayag mo kana. Nagatoo ka niini. Sultihan Ko ikaw kung unsa ang mahimo natong buhaton. Adto tà ug tigumon ang mga anciano, ug moadto didto ug tan-awon kung aduna pa ba’y unsa mang butang nga atong mahimo mahitungod niini.” Dili, dili. Ang ingon Niya, “Akong. . .” Dili nga, “moadto didto ug *tan-awon* kung mahimo Ko ba nga banhawon siya.” “Kondili moadto Ako’g pukawon siya.” Amen. Dili nga, “Akong—Akong sulayan.” “Buhaton Ko.” Wala gyu’y unsa man nga dili-sigurado. Dili kadto tingog nga walay-kasigurohan, sa dihang miingon Siya, “Buhaton Ko. Buhaton Ko.”

208 Ug ang mao gihapong Dios nga miingon, “Buhaton Ko,” ang nagsaad kaninyo. Alleluyah! Oh, grabe! Amen.

“Moadto Ako ug pukawon siya.”

209 Usab miingon ba Siya, “Gub-a ninyo kining templo, ug tan-awon Ko kung unsay mahimo Kong buhaton mahitungod niini?” “Gub-a ninyo kining templo, ug Akong patindogon kini sulod sa tulo ka adlaw.” Walay unsa man nga dili-sigurado. “Karon Akong sulayan. Mahimo kamong tanan nga motindog sa palibot ug tan-awa n’yo kung mahimo Ko ba kini o dili”? Ah, dili ingon-ana. “Akong patindogon kini.” Wala gyu’y unsa man nga dili-sigurado. “Akong patindogon kini. Inyong—gub-a ninyo kini; Akong patindogon kini.” Oh, grabe!

210 Ngano man? Nasayod man Siya nga Siya mao kadtong Tawo, sa Kasulatan, nga gihisgotan kaniadto ni David. “Dili Ko pagabiyaan ang Iyang kalag didto sa sheol, ni motugot Ako nga ang Akong Balaan makakita og pagkadunot.” Ug nasayod Siya nga apil Siya diha nianang gisaad sa Kasulatan, mao nga sigurado gayud Siya.

211 Karon, dili ba kita mamahimong ingon niana pud ka sigurado? Himoon nato Siyang, panig-ingnan, para sa uban pa nga mga butang. Basta gisulti kini sa Pulong sa Dios, nan dili ba kita mamahimong ingon ka sigurado mahitungod sa Pulong nga sama Kaniya mahitungod niini?

212 “Ako mao ang pagkabanhaw ug Kinabuhi.” “Akong patindogon kini pag-usab.” Amen. Ngano man? Nasayod man Siya nga naghisgot niini ang Pulong, ug sigurado gayud Siya nga mabanhaw.

213 Kung ako kanang tawo dinha sa Juan 5:24, “Siya nga nagapatalinghug sa Akong Pulong ug nagatoo Kaniya nga nagsugo Kanako, adunay Kinabuhing walay katapusan, ug pagabanhawon Ko siya sa kaulahiing mga adlaw. Dili siya Pagahukman sa silot; kondili miagi na gikan sa kamatayon ngadto sa Kinabuhi.” Kana’y—kita man kana. Ug unya unsa ba’y atong gikahadlokan? Unsa ma’y problema?

214 Unsa ba’y kalahian kung unsa man ang imong patik? Nagapatawag pa mo sa inyong kaugalingon nga *ingon niini*,

ingon niana, o ang *uban pa*. Mga anak kita sa Dios, tungod sa grasya sa Dios. Napuno kita sa Espiritu Santo, pinaagi sa grasya sa Dios. Unsa ba’y kalahian kung *kining* usa *ingon niana* o *ingon niana*, kung usa siya ka Presbyterian, Methodist, Baptist? Kung puno siya sa Espiritu Santo, aduna siya sa kinasuloran niya og Kinabuhi nga mabanhaw. Amen. Oo. Bueno, niadtong Adlaw sa Pentecostes . . .

215 Gisultihan sila ni Jesus, diha sa Lucas 24:49, “Ania karon, Ako magapadala sa saad.” Dili nga, “Mahimong ipadala Ko kini. Tan-awon Ko kung unsay mahimo Ko mahitungod niini.” “Ako magapadala sa saad sa Akong Amahan nganha kaninyo. Apan umadto kamo sa siyudad sa Jerusalem ug maghulat hangtud nga masul-oban na kamo og gahum.”

216 Karon, unsa kaha kung naghulat sila, ingnon tà, oh, unom ka adlaw, og miingon sila, “Unsa pa ba’y atong ginahulat? Nagatoo ko nga kinahanglan natong dawaton kini pinaagi’g pagtoo. Wala ba ninyo mahunahuna kana?”

217 Unsa kaha kung miingon si Santiago, sa—sa ikasiyam ka adlaw, miingon, “Simon, ari ka kadali. Abi nimo, niadtong miaging adlaw daw sa aduna ako’y talagsaon nga pagbati. Kita mo? Ug kabalo ba ka kung unsay akong nahunahuna? Ako—ako—sa hunahuna ko dili man gyud Niya gusto nga maghulat kita dinhi. Nagatoo ko nga atong—naangkon na nato kini. Wala ba ninyo mahunahuna kana? Ipadayon na nato ang atong buluhaton. Ipadayon na nato ang atong ministerio”? Oh, wala gyud unta kadto nahitabo.

218 Nganon man? Nasayod sila nga miingon ang propeta. Karon paminaw. Miingon ang propeta, “Kini mao ang sugo ibabaw sa sugo, lagda ibabaw sa lagda, ibabaw sa lagda; dinhi madiyutay ug didto madiyutay.” “Kupti ninyo kung unsa ang maayo.” “Kay sa nagabungabunga nga mga ngabil ug laing mga pinulongan Ako mosulti niining katawohan. Ug kini mao ang kapahulayan, ang sabbath.” Nasayod sila nga aduna gyu’y butang nga siguradong mahitabo pag moabot na Kini.

219 “Igabubo Ko ang Akong Espiritu sa kaulahiing adlaw.” Joel 2:28, “Mahitabo sa kaulahiing mga adlaw, ang ingon sa Dios, igabubo Ko ang Akong Espiritu sa tanang unod, ug magahimo’g propesiya ang inyong mga anak nga lalaki ug mga anak nga babaye. Ang Akong mga alagad nga babaye ug mga sulugoong babaye pagabuboan Ko sa Akong Espiritu, nianang adlaw. Magapakita Ako og mga ilhanan sa itaas diha sa langit ug—ug sa yuta sa ilalum, ug kalayo, ug aso, ug inalisngaw.”

220 Nasayod sila nga siguradong aduna gayu’y usa ka kasinatian nga magauban sa pag-abot sa Espiritu Santo. Dili tingog nga walay-kasigurohan ang ilang nadawat. Apan sa dihang nabati nila nga adunay butang nga namuhat, ug nakita ang kapanghimatuoran sa Biblia nga namuhat uban niini, wala

sila nagduhaduha. Miadto dayon sila ngadto sa mga kalsada. Pasensya na. Oh, my! Sigurado gayud sila nga ang Espiritu Santo mismo kadto.

²²¹ Kabalo ba mo kung unsa sila ka sigurado? Hangtud nga, si Pedro, kadtong dili-edukado nga tawo, mitindog didto sa usa ka tuud o usa ka kahon, o sa kon asa man, og miingon, “Kamong mga katawohan sa Judaea,” nga pinabugdo ang dughan nga sama sa usa ka gamay’ng sunoy. Ingon siya, “Kamong mga katawohan sa Judaea, kamo nga nagapuyo sa Jerusalem! Nahadlok ako kaninyo, kaganina; pero dili na, karon. Ipahibalo ko kini kaninyo, ug paminaw kamo sa akong mga pulong. Dili kini sila mga hubog maingon sa inyong ginahunahuna. Apan kini *mao* Kana.” “Kami *nagalaum* nga kini mao Kana”? “Kami *nagatoo* nga kini mao Kana”? Ang ingon niya, “Kini *mao* Kadtong giingon sa propeta nga si Joel.” Alleluyah! Wala gyu’y unsa man nga dili-sigurado mahitungod niini. “Kini *mao* Kadtong giingon sa propeta nga si Joel.” Oh, my!

²²² Miingon si Jesus, diha sa Marcos 16, gisugo ang Iyang Iglesia, “Panglakaw kamo sa tibuok kalibutan, og iwali ang Maayong Balita.” “Kini nga mga ilhanan tingali’g kinahanglan; mamahimo ang mga niini, usahay, siguro”? “Ang mga niini magauban niadtong mga nagatoo. Kini nga mga ilhanan maganunot kanila nga nagatoo. Sa Akong Ngalan pagahinginlan nila ang mga yawa. Magasulti sila og mga bag-ong sinultihan. Kung makakupot sila og bitin o makainom og butang nga makahilo, dili kini makadaut kanila. Kung pagapandongan nila sa ilang mga kamot ang mga masakiton, mangaayo sila.” Dili nga, “Tingali.” “Kondili mangaayo gyud sila. Kini nga mga ilhanan maganunot kanila nga nagatoo.”

²²³ Sumahon ko kini, sa pagsulti niini, igsoong lalaki, igsoong babaye, sa mosunod nga pipila ka minuto. Nagatoo ako niini. Nagatoo ako nga ang tanang uban pa, unsa man nga sukwahi Niana, dili gayud husto. Nagatoo ako, nga ang tanan nga batok Niana mahugno. Nagatoo ako, dili ko igsapayan kung unsa man ka daghang komunismo, o unsa ka daghang *ingon-ani* nga mga ismo ug *ingon-ana* nga ismo, ug iglesianismo ug Romanismo, ug tanang uban pa, mga Amerikanismo ug tanang uban pa mapukan gayud.

²²⁴ Apan ang Pulong magapabilin gayud sa Walay Katapusan, tungod kay usa man Kini ka Pulong. Ug sa wala pa kini nahimong usa ka Pulong, kinahanglan kini úna nga usa ka hunahuna. Ug ang pulong maoy hunahuna nga napahayag. Ug ang Dios, sa Eternidad, miabot kini sa Iyang panghunahuna. Gipahayag Niya ang Iyang mga hunahuna. Nahimo kini nga Pulong, ug gikinahanglan mahipadayag ang Pulong.

²²⁵ Mao kana’y hinungdan, nga sa naghigot Siya mahitungod sa usa ka Mesias, kinahanglan aduna gyu’y moabot nga usa ka

Mesias. Gisulti pud Niya nga magkaaduna og usa ka Iglesia sa kaulahiang mga adlaw, nga walay buling ni kunot man; nan magkaaduna gayud og usa ka Iglesia dinha. Alleluyah! Gisulti Niya kini. Ginadawat ko ang Iyang Pulong. Nagatoo ako niini.

²²⁶ Nagatoo ako nga gisaad Niya ang Espiritu Santo alang sa matag magtotoo nga mooto. Nagatoo ako kang Pedro, niadtong Adlaw sa Pentecostes, sa dihang giwali niya kadtong halangdon nga wali, ug gisultihan niya silang tanan nga maghinulsol ug magpabautismo, nga kini nga mga ilhanan magaabot, ug *kini*. “Ang si kinsa man nga magatawag sa Ngalan sa Ginoo mamaluwas.” Nagatoo ako nga Kamatuoran kana; nagabarug ko niini. Nakita ko na kini nga napadayag.

²²⁷ Nasayod ko nga nagapakiggubat ako niini. Ug nasayod ko nga nagapaningkamot ako sa pagtikang. Sa dili pa ako motikang, kinahanglan ko úna nga putlon ang matag nagkasabud-sabud, mga sapinit, og tanan nang uban pa, aron maihiklin kini sa dalanon. Apan sa matag higayon nga nagatikang ka, nagaabante pud ka. Amen. Kuhaa lang ang sanggot ug pangtigbasa kini.

²²⁸ Daghan kaninyo ang nakahinumdom kang Paul Rader, nga usa ka suod kaayo nako nga higala. Usa pa lang ako ka batan-ong magwawali kaniadto, nga bata-bata pa. Nagaadto ko kaniadto sa Fort Wayne, para maminaw kaniya, didto sa Rediger Tabernacle. Daku kaayo nga tawo! Moatras siya, birahon pataas ang iyang karsones, ipataas ang iyang kamot ug mongulob nga mora’g oso, ug abi gud nako’g molukso siya sa pulpito. Pag iyang . . . Ug magsugod siya sa usa ka teksto, oo, diha sa Genesis, ug paingon sa Pinadayag, og balik-balikon kini. Si Paul usa ka tawong talagsaon.

²²⁹ Nag-istoryahanay mi usa niadto ka adlaw, ingon siya, “Usa man ako ka mamumutol og kahoy kaniadto didto sa Oregon,” kon diin siya naggikan. Miingon, “Usa ka adlaw, abi nimo,” ingon siya, “ako—atua ako sa natad sa pagpangmisyon, didto sa usa ka lugar.” Nakalimtan ko na kung asa kadtó. Ug atua siya didto sa usa ka pang-misyonaryo nga buluhaton.

²³⁰ Nagatoo siya sa Dios, nagatoo siya sa Balaanong pagpang-ayo. Ug miingon si Paul, dinhi mismo kon diin napahimutang karon ang pang-kalibutan nga iglesia, ingon siya, “Kung gidala ko pa unta ang akong mensahe mahitungod sa grasya ngadto sa mainiton nga mga Pentecostal, imbis nga buhaton kung unsay ginabuhar ko dinhi uban kaninyo nga pundok,” miingon, “ug naghinungdan pa hinoon kanako nga mabalaka, tungod nga nahidangat ako sa usa ka lugar nga nagkautang og linibo ka pilo nga dolyares. Nabalaka ako og ayo hangtud nga nagka-kanser ako, ug naghimalatyon na karon. Kung gidala ko pa unta ang akong mensahe mahitungod sa grasya ngadto sa mainiton nga

mga Pentecostal, nan gipanalanginan na unta ako sa Dios sa bug-os nga kadagaya tungod niini.” Husto.

²³¹ Miingon siya nga atua siya kono niadto sa—sa kalasangan, ug natakboyan siya og blackwater fever o ingon niana. Grabe kono kadto. Ug atua siya didto sa kalasangan, ug usa man siya ka lig-on nga magtotoo sa Balaanong pagpang-ayo. Ug ingon pa niya nga nagkagrabe ug nagkagrabe kono ang iyang sakit. Nag-ampo siya, nga nag-ampo. Ug pipila kono sa mga misyonaryo ang miingon nga mokuha na sila og sakayan para magkuha og usa ka doktor. Aba, abton gyud sila og pila ka adlaw para makakuha og doktor. Ug mao nga miingon siya, “Ako—ako. . . Ayaw na kana buhata. Pasagdi na lang kini.” Ingon pa, “Kung dili man ako ayohon sa Dios, nan Mopauli na ako.”

²³² Ug ingon siya nga nagpabilin ra kono sulod sa lawak ang iyang asawa uban sa iyaha. Nagkangitngit ug nagkangitngit kono. Ug ingon pa nga gitawag niya ang iyang asawa, og miingon, “Honey, guniti ang akong kamot.” Miingon, “Basta padayon lang akong iampo. Nagakangitngit na karon.” Ingon pa, “Ako—nagatoo ko nga nagapalibot na sa ako ang mga landong.” Ingon siya, “Guniti. . . Guniti lang ang akong kamot ug mag-ampo, sa diha nga motaliwan na ako.” Giandam na niya ang iyang kaugalingon kaniadto, aron tagboon ang Dios.

²³³ Daw sa nahiadto kono siya sa usa ka panan-awon. Ug ingon niya nga nagdamgo kono siya nga atua siya pag-usab sa Oregon, ingon nga usa ka batan-ong lalaki, nga nagapamutol og kahoy. Ug miingon nga ang agalon kono sa kampo nag-ingon, “Paul, saka ngari sa usa ka bahin sa bungtod, ug pag-putol og usa ka kahoy, nga ingon-ani ang kadak-on.”

²³⁴ Ingon niya nga midagan kono siya ngadto sa bungtod ingon nga batan-on pa kaniadto ang iyang mga bitiis, ug gitumba ang kahoy, ug giputol kadto, gipataup ang atsa. Ingon niya nga pagkahumok kono niadtong kahoy’ng pino, diin ang iyang mahait, daku, og duhay-sulab nga atsa pagkanindot kaayo nga midulot sa maong kahoy’ng pino. Ug miingon nga iya konong gihawiran kadto, og nahunahuna, “Bueno, pas-anon ko na lang kini panaug sa bungtod.”

²³⁵ Himsog, kusgan nga tawo, ingon niya, “Nabansay man gud ko kaniadto kung unsaon ko paghan-ay ang akong mga tuhod, ug magpas-an nganhi sa akong likod, nga mao’y pinakadaku nga bahin sa tawo.” May mga muskulo gud sa iyang likod ug mga abaga, og sa luyo sa iyang mga bitiis. Miingon, “Pas-anon ko ang usa ka dakung troso,” ginapapas-an kadto diha sa iyang abaga, og maglakaw. Apan miingon, “Usa lang man kadto ka ordinaryo nga troso, pero,” miingon, “ako gayu’y. . .” [Naigo ni Igsoong Branham ang mikropono—Ed.] (Pasensya na.) Ingon pa, “Pero dili gyud nako malihok kadto nga troso.” (Pasensya na.)

²³⁶ Ingon siya, “Dili man lang nako malihok kadto nga troso.” Ingon pa siya, “Nakiglayog na ko, ug nakiglayog gyud ug gipaningkamotan ko nang alsahon kadto, pero dili gayud nako maalsa kadto.” Ingon siya, “Nahurot na lang ang tanan kong kusog.” Ingon siya, “Pero dili gyud nako maalsa kadto nga troso.” Ug miingon, “Sa katapusan, naluya na ko pag-ayo, mao nga milingkod na lang ko nga nakasandig sa kahoy ug hinay-hinay nga nanarapo og singot. Nahago gayud ako.”

²³⁷ Ug miingon, “Wala magdugay, nadungog ko ang tingog sa akong agalon.” Pero miingon, “Kadto ang pinakamalumo nga tingog nga akong nadungog sukad-sukad.” Ug ingon pa, “Sa paglingi ko, miingon kanako ang tingog, ‘Paul.’ Ug ingon ko, ‘Oo, agalon, unsa man?’ Miingon, ‘Nganong ginaguyod mo man kana?’” Ingon siya, “‘Bueno, gisugo baya ko nimo nga dalhon kini ngadto sa kampo, ug nahago na lang ko, tungod niini. Ako—dili gayud nako mapas-an kini, agalon.’ Ingon niya, ‘Paul, wala ba nimo makita kanang tubig sa sapa nga nagadagayday mismo *dinha*?’ Mitubag, ‘Oo.’ Miingon, ‘Kana nga sapa diretso baya paingon ngadto sa kampo. Nganong dili na lang man nimo ilabay kini sa tubig, molutaw ka uban niini ug mosakay paingon ngadto sa kampo?’ Mitubag pud, ‘Wala gyud nako nahunahuna kana.’”

²³⁸ Busa gipaligid niya mismo kadto sa tubig, milutaw uban niadto, og miingon, “Oh, pagkahayahay!” Hinay-hinay na siyang nagkasaw-kasaw sa tubig, ug nagalutaw-lutaw, ug nagasinggit, sa makusog niyang tingog, samtang nagaagi siya sa mga sulog, ug nagapaubos siya subay sa tubig, og tanan na, nga nagasakay niadtong troso, paubos, nga nagasinggit, “Nagasakay ako niini! Nagasakay ako niini!”

²³⁹ Miingon siya, sa kalit lang kono, naamgo niya, atua na diay siya tunga-tunga sa salog, ug nagasinggit pud ang iyang asawa kauban niya. Nagasinggit siya, “Nagasakay ako niini! Nagasakay ako niini! Nagasakay ako niini!” Mga igsoon!

Mga nasud nanagkabulag, nagakahigmata na ang Israel,
Mga ilhanan nga gipanagna na sa Biblia;
Inihip na lang ang mga adlaw sa Gentil,
inubanan sa mabug-at nga kasakit;
“Balik na, Oh mga nangapatlaag, sa inyo mismong kaugalingong-yuta.”

²⁴⁰ Kini nga Mensahe sa Pulong sa Dios mao gayud ang Kamatuoran. Mabuhi man o mamatay, nagasakay ako Niini. Dili ko . . . dili ko nagapakiglantugi bahin Niini. Dili ko ginatinguha nga makiglantugi mahitungod Niini. Ginadawat ko lamang Kini, ug nagasakay ako Niini. Manungha man ang mga kritiko. Pagalabyan ko ang matag sulog. Nagapaingon na ako sa kampo, usa sa niining mga adlaw, nga nagasakay sa Pulong sa Dios. Amen. Sigurado gyud ako nga makadangat didto.

Mag-ampo kita.

241 Nganong ginaguyod man ninyo ang inyong kabug-aton sa sala? Nganong magpabilin man kamo sa ingon-anang kahimtang nga inyong nahimutangan karon, nga wala nanghibalo kon asa gyud kamo nagabarug, nagabalhin-balhin gikan sa usa ka iglesia ngadto sa usa pa ka iglesia, ug gikan sa usa ka lugar ngadto sa usa na usab ka lugar? Ngano dili na lang ninyo isalibay kana, ngadto sa krus, karong gabhiona, ug mosakay na sa Pulong? Nganong dili na lang ninyo dawaton ang saad sa Dios karong gabhiona ug mosakay pagawas gikan sa maong kalamukat, og paingon ngadto sa halapad og abli, nga kawanangan nga sama niana? Ayaw kamo pakiglayog Niini. Ayaw kamo'g kabalaka Niini. Toohi n'yo lamang Kini, og dawata Kini. Usa Kini ka Ginghamian nga dili matarug. Sakay na mo Niini.

242 Kung nagmasakiton kamo karong gabhiona, kupti n'yo ang saad sa Dios, "Ako mao ang Ginoo nga nagaayo sa tanan n'yong mga balatian."

243 "Unsaon man nako pagkaayo, Igsoong Branham? Ang ingon sa doktor nga aduna ako'y sakit sa kasingkasing, aduna ako'y kanser, aduna ko'y *ingon-ani*, *ingon-ana*," unsa man kini, "ako'y bungol, amang. Buta ako," o unsa man. Unsa ma'y kalahian niana? Basta dawata lang ang saad sa Dios ug mosakay niini.

244 Magkuha tà og usa ka daku nga tabla, ug ipahimutang kini dinhi, ug isulat sa ibabaw niini, "Naiampo na ang pag-ampo nga inubana'g pagtoo karong gabhiona; mosakay ako niini. Miingon ang Biblia, 'Ang pag-ampo nga inubana'g pagtoo magaayo sa masakiton, ug pagabangonon siya sa Dios. Kung siya nakasala man, siya pagapasayloon.' Nagasakay ako niini. Nagatoo ako niini."

245 Kung nakabuhat ka og sayup, kung nahisalaag ka man karong gabhiona, "Siya nga nagatabon sa iyang sala dili mouswag. Apan siya nga nagasugid sa iyang sala makadawat og kalooy." Nganong dili mo man isugid kini?

"Bueno, unsa ba'y angay kong buhaton, Igsoong Branham?"

246 Isugid kini, ug dayon mosakay niini. Mao kana ang giingon sa Dios. Sa gilayon dalhon kamo niini palayo sa inyong sala.

247 Ania ba kana nga tawo karong gabhiona, nga wala pa gayud gipahimutang ang ilang tinuod nga pagsalig sa Dios alang sa kaluwasan sa inyong kalag, ug gusto n'yong mahinumduman sa pag-ampo samtang nagatapos kita? Mahimo n'yo bang ipataas ang inyong kamot, og moingon, "Iampo ako, Igsoong Branham. Gusto kong itugyan ang akong mga kabalaka." Panalanginan ka sa Dios. Panalanginan ka sa Dios. "Gusto kong itugyan. . ." Panalanginan ka sa Dios, ma'am. "Gusto kong itugyan ang akong mga kabalaka." Panalanginan ka sa Dios, igsoon. Panalanginan ka sa Dios dinha sa luyo, sir. Panalanginan ka sa Dios, batan-ong babaye. Sige. Husto kana. Panalanginan

ka sa Dios. “Gusto kong itugyan ang akong mga kabalaka nganha Kaniya ug mosakay lang gayud sa Iyang saad karon. Nagatoo ako nga nagsaad Siya, ‘Siya nga moduol Kanako, dili Ko gayud isalikway.’”

²⁴⁸ “Dili nga kung unsay akong gibati, ‘Naiampo na ako kagabii, Igsoong Branham; pero wala pa man miarang-arang ang akong paminaw.’” Wala kana’y kahilambigitan ni usa ka butang niini. Wala ako nagasakay sa akong mga gibati. Kondili nagasakay ako sa Iyang Pulong. Kini ang Iyahang saad.

²⁴⁹ “Igsoong Branham, nakaduol na ako sa altar, sa makaupat o makalima na ka higayon, nga ginapaninguha nga madawat ang Espiritu Santo. Pero wala ko pa Kini naangkon.”

²⁵⁰ Wala kana nagkahulogan ni usa ka butang. Pabilin lamang diha sa troso, pagadalhon kamo niini paingon mismo sa kampo, sa kampo sa Kamagulangan, sa kampo sa mga balaan. Makadangat gyud kamo didto. Basta magpabilin lang mo sa inyong gisakya’ng troso, ug isinggit ug isiyagit ang mga pagdalayeg sa Dios kutob sa mahimo n’yo. Sa ingon-anang paagi kini buhaton.

²⁵¹ Samtang nakaduko ang atong mga ulo, gitinguha ba gayud ninyo nga mosakay niini? Kung ingon-ana, kanang gamay’ng butang nga nagahikap sa inyong kasingkasing, buot n’yo ba nga moduol dinhi ug motindog sa atubangan sa altar sa makadiyut ug mag-ampo kami ug magpandong og mga kamot nganha kaninyo? Ikalipay namo nga mangduol kamo.

²⁵² Atong patalinghugan kanang gamay’ng butang nga napahimutang dinha sa inyong kasingkasing karong gabhiona, ug nga nagaingon, “Abi nimo, nasayup ka. Karon ipataas ang imong kamot.” Sige.

²⁵³ Magpatong kamo diha sa troso, sa troso sa Iyang saad; ang kahoy, ang krus nga giputol. Gakusa n’yo kini nga krus karon. Moduol dinhi mismo ug moingon, “Karon mosakay na ako niini. Karon mismo toohan ko na kini. Dawaton ko na kini. Nagatoo ako niini. Dili na ako mag-usab-usab. Magpabilin na ako mismo nianang Pulong, hangtud nga mapanghimatud-an kanang usa. Ug dayon human nga mapanghimatud-an kanang usa, mokabot ako dinha mismo ug mopatong sa usa pa, ug dire-diretso na nga nagasakay.” Kita n’yo?

²⁵⁴ Ug sa matag pulong, matag lakang, mapanag-iya ninyo ang tanang butang nga gisaad kaninyo sa Dios. “Kay ang tanang butang mamahimo,” alang kaniya nga mosakay niini. Pagsakay sa Iyang saad, kay sigurado gyud nga dalhon kamo niini paingon sa kampo. Dalhon kamo niini ngadto sa Presensiya sa Dios.

²⁵⁵ Mahimo ba nga moduol kamo karon samtang nakaduko ang atong mga ulo? Ug ginahangyo ko ang si kinsa man nga gustong motindog diha sa altar, sa makadiyut alang sa pag-ampo.

256 “Nagasakay ako niini, Ginoo. Ginoo, nagatoo ako. Ang tanan kong mga pagduhaduha gilubong na diha sa tuboran. Ginoo, nagaduol ako. Nagatoo ako niini. Nagapatong na ko mismo sa Pulong karong gabhiona, ug toohan ko kini sa tibuok kong kasingkasing. Ginatoohan ko Ikaw sa Imong Pulong.”

257 Usa ka minahal nga babaye ang nagatindog dinhi sa altar, aron—aron panghimatud-an sa Dios nga siya’y sinsero gayud. Mahimo n’yo bang moduol, kamong mga nakaduko ang mga ulo, ug nagpataas sa inyong mga kamot, ug gustong mahinumduman sa pag-ampo? Mahimo ba nga moduol lang kamo dinhi? Panalanginan kamo sa Dios. Duol lang. Ingon-ana. Duol mo ug tindog dinhi. Moingon, “Mosakay ako niini. Dios, nagsaad man Ka, may sa kung unsang butang nga mituktok sa akong kasingkasing, ug nagaduol ako karon mismo aron mosakay niana. Ug magpabilin ako niini hangtud nga dalhon ko niini mismo paingon sa kampo. Nagapaingon na ako sa kampo sa mga balaan sa Labing Hataas.” Panalanginan kamo sa Dios. Maayo kana. Duol na mo karon, kamo nga gustong mosakay niini. Sa kung unsa gayud kamo, “Ania ako, nga wala na’y ubang hangyo.”

258 Hinumdumi. Moingon mo, “Usa ba kana ka kahoy?” Oo. Adunay usa ka kahoy nga giputol, usa ka higayon, ug gipahimutang kadto pag-usab sa Kalbaryo. Pagsakay lang mo niana nga kahoy karong gabhiona, nga aduna ang mga saad sa Dios, ang Pulong nga nagbitay didto sa maong kahoy.

259 Nagasakay ako niini. Toohan ko kini, sa tibuok kong kasingkasing. Gusto kong buhaton bisan ang pagduol man lang dinhi ug malamano ang akong mga kaigsoonan.

260 Panalanginan kamo sa Dios, tungod sa inyong maisogon nga pagbarug. Buot ko nga magpabilin sa kamo dinhi, sa makadiyut, samtang mag-ampo kita. Panalanginan ka sa Dios, igsoon kong lalaki. Minahal kong igsoong babaye, panalanginan ka sa Dios. Ang Ginoong Jesus . . . ? . . . panalanginan ka sa Dios, igsoon kong lalaki. Panalanginan ka sa Dios, igsoong babaye. “Giyahi ako.” Giyahan kamo didto sa suba.

261 Hinumdumi n’yo, ingon nga usa ka alagad ni Cristo, tulubagon ko ang pagwali sa Pulong. Tulubagon ko ang akong testimonyo. Ug motindog kaha ko dinhi karong gabhiona . . .

262 Ug usa ka tawo nga singkwenta’y-singko anyos na, o singkwenta’y-tres anyos na ang panuigon, nga magsingkwenta’y-kuwatro na sa Abril, ug motindog dinhi ug nasayod nga, bisan kining ulahing panan-awon, mahimong mao na kini ang akong ulahing pipila ka adlaw sa kalibutan. Ako—mahimong biyaan ko na kamo sulod sa pila ka adlaw. Wala ako mahibalo kung unsay kahulogan niini. Paminawa lang ninyo ang teyp ug maghimo og kaugalingon n’yong konklusyon. Wala man ko mahibalo kung unsay kahulogan niini. Motindog kaha

ko dinhi, nga alang-alang ra nga nagatoo nga mahimong mao na kini ang mga ulahi kong mensahe nga akong iwali, dinhi mismo sa Phoenix, ug mosulti og butang nga sayup, ug ingon nga hingsayran ko nga ang akong destinasyon atua human niining kinabuhi, ug unya pagahukman ako tungod sa akong mga gipamulong?

²⁶³ Mga igsoon ko, isulti ko kini kaninyo, ug sa mga igsoon kong babaye. Nakatambong na man mo sa mga panagtigum. Kabalo na mo kung unsa, ang mga pagpang-ila ug mga ingon-anang butang. Aduna ba ko'y gisulti kaninyo sukad og bisan unsang butang, diha sa Ngalan sa Ginoo, kondili kung unsa lang ang nagakatuman? Mangutana ako sa kang kinsa man. Wala, sir. Sa tibuo kalibutan, ug sa liboan ka mga panan-awon, wala pa gayud sukad nga dunay wala natuman. Ug ginasulti ko kaninyo ang kamatuoran karong gabhiona, ang Dugo ni Jesus Cristo may-kasarang gayud nga walaon niini ang matag mantsa, ug mapanas gayud.

Adunay usa ka Tuboran nga puno sa Dugo, (Ug nagatindog na kamo Niini karon.)

Nga gikan sa mga kaugatan ni Emmanuel,
(Ang bugtong sigurado nga butang nga nahibilin sa yuta.)

Diin ang mga makasasala nga nanglusbog sa
maong buhagay,
Mangatangtang ang tanan nilang mga lama sa
sala.

²⁶⁴ Hangyoon ko kining mga ministro karon, ug mga kaigsoonang lalaki, nga kung mahimo moduol kamo dinhi sa taliwala niini nga mga tawo. Kinsa man nga... Ingon-ana ba, ang pagtawag n'yo sa mga ministro nga mag-ampo kauban ang mga tawo? Ang tanan nga mga ministro dinhi, kung ingon-ana, nga gusto, nga may kahingawa nga makita ang mga kalag nga maluwas, magduol dinhi ug motindog ingon nga usa ka pundok sa mga tig-ampo, kon diin mahimo natong bugkason ang atong mga kaugalingon, magpahilayo sa tanang uban pang butang, ug ihimulag ang atong mga kaugalingon. Kini'y mga kalalaken-an ug mga kababayen-an nga ginaselyohan ang ilang destinasyon, karong gabhiona, pinaagi sa Dugo ni Jesus Cristo, nga ginatoohan Siya sa Iyang Pulong, nagasakay paingon mismo sa Iyang Prezensiya, sa Iyang Pulong, ug nagaingon, "Ania ako, Ginoo. Wala gyud ko'y bisan unsa mang ikahalad kondili ang akong kaugalingon lang, ug dawata intawon ako." Mahimo ba nga motindog kamo uban kanila, kung mahimo unta? Ang si kinsa man nga gustong, moduol ug motindog. Panalanginan kamo sa Dios, mga igsoon kong lalaki. Maayo gayud kana. Ganahan gyud kong makakita og mga kalalaken-an nga maisogson, nga may kahingawa sa mga kalag. Sa hunahuna ko, nga igsoon ko, maayo gyud kana. Duol na mo. Maayo kana.

Tindog mo sa palibot. Karon ato lamang . . .

²⁶⁵ Kung mahimo moduol na ang piyanista sa musika, palihog, og atong awiton kini nga himno, karon nga may pagkamalulot, nga ingon ka tarung, og may pagtahud.

²⁶⁶ Wala kita nagaduol sa kung unsang tinumo-tumo ra nga butang. Wala kita nagaduol sa usa ka butang nga usa—usa—usa ka too-too lamang. Kondili nagaduol kita sa Presensiya sa Dios, ang makagagahum-sa-tanan nga Jehovah nga Dios, Nga mao’y nagsaad, nga, “Diin gani ang duha o tulo nga magakatigum sa Akong Ngalan, anaa Ako sa ilang taliwala.” Istoryaha n’yo Siya nga sama sa inyong pagpakig-istorya sa inyong higala, moingon, “Ginoo, pasayloa ako. Nakasala ako.” Ug moawit kita.

Adunay usa ka Tuboran nga puno sa Dugo,
Nga gikan sa mga kaugatan ni Emmanuel,
Diin ang mga makasasala nga nanglusbog sa
maong Buhagay,
Mangatangtang ang tanan nilang mga lama sa
sala.

Kadtong naghimalatyon nang kawatan
nalipay nga makita
Kadtong Tuboran sa iyang adlaw;
Dinha hinaut ako, nga bisan ingon ka dautan
sama niya,
Pagahugasan ang tanan kong mga sala.

Sukad-sukad nga pinaagi sa pagtoo nakita ko
kadtong Sapa
Nga nagagikan sa Imong nagadugong samad,
Gugmang nagatubos mao na’y akong tema,
Ug mao sa gihapon hangtud nga ako mamatay.

²⁶⁷ Magmapainubsanon ra gyud karon. Wala gyud kamo. Wala gyu’y si kinsa man kanato. Ug ingon gayud ka magmatinuuron karon, sa tibuok n’yong kasingkasing, iyukbo lamang ang inyong mga kasingkasing ug mga ulo, sa tanang dapit, sa tibuok bilding.

²⁶⁸ Langitnong namong Amahan, nasayod ako nga ang Imong mga Pulong ingon gyud ka tinuod. Dili mapakyas ang mga Niini. Kini mao ang Pulong sa Dios. Kini mao ang Dios. Ug miingon man Ka, “Siya nga moduol Kanako, dili Ko gayud isalikway.” Ug kining mga kalalaken-an ug mga kababayan-an, nga may kombiksyon, nga nasayod nga dili sila husto, mao nga nangduol sila, karong gabhiona, Ginoo, aron magsugid nga sayup sila, nga nanghibalo nga gitandog sila sa kung unsa nga paglihok sa kinasuloran nila nga—nga nag-aghat kanila nga moduol sa Tuboran. Ug ania sila nagatindog, nga nakayukbo ang mga ulo ug mga kasingkasing, aron moinom sa mga Tubig sa Kinabuhi, nga walay-bayad, nga gisaad sa Dios. Dawata sila, Amahan, nganha sa Imong Gingharian. Imoha man sila.

269 Miingon Ka, “Walay tawong makahimo sa pag-ari Kanako gawas kon pagadanihon siya una sa Akong Amahan. Ug ang tanan nga gikahatag Kanako sa Amahan magaaari Kanako.” Ug nagapakita kini nga gihatag na sa Dios ang mga niini kang Cristo, ingon nga usa ka gasa sa gugma. Ug ania sila karon nga nagatindog, Ginoo. “Walay tawo nga makailog kanila gikan sa Akong kamot.” Ug nagaampo ako, Dios, nga luwason Mo sila karong gabhiona, samtang nagatindog sila dinhi, ug ihatag kanila ang bautismo sa Espiritu Santo samtang ania sila dinhi sa altar.

270 Hinaut nga ang dakung gahum ni Cristo motuhop gayud sa ilang mga kinabuhi karon! Naghimo na sila og pagsugid. Ingon nga nangduol sila. Miingon Ka, “Siya nga magasugid Kanako sa atubangan sa mga tawo, igasugid Ko usab siya sa atubangan sa Akong Amahan ug sa balaang mga Manulonda.” Nasayod kami nga tapos na kana nga buhat.

271 Karon, Ginoo, selyohi sila pasulod sa Gingharian sa saad, sa Espiritu Santo. Itugot kini, Ginoo. Ibubo ang Imong Espiritu nganha kanila, ug pun-a sila sa Espiritu sa buhi nga Dios, aron nga mamahimo silang mga buhi nga mga testimonyo sa tanang mga adlaw sa ilang mga kinabuhi, alang sa Gingharian sa Dios.

272 Karon manindog ang mga mananambong. Mag-ampo ang tanan karon. Atong iampo nga kining mga . . .

273 Karon, ang matag usa kaninyo nga mianhi karong gabhiona, nga nabati n’yo nga adunay sala sa inyong kasingkasing, karon walay unsa man nga mahimo ninyo kondili ang toohan kana. Ang Balaan . . . Dawata ninyo *Kini* pinaagi sa pagtoo. Kini mao’y pagtoo, nga inyong ginadawat. Miingon si Jesus, “Walay tawong makahimo sa pag-ari Kanako gawas kon pagadanihon siya una sa Akong Amahan. Ug ang tanan nga nagaari Kanako,” Iya kining dawaton. Wala Siya’y unsa pa man nga mahimo, tungod kay gisaad man Niya kini. Kita n’yo? Ayaw kamo pagsalig sa usa ka sensasyon karon. Kondili sumalig kamo sa Iyang Pulong. Kita n’yo? Mao ma’y giingon sa Pulong.

274 “Siya nga nagapatalinghug sa Akong mga Pulong ug nagatoo Kaniya nga nagsugo Kanako, adunay,” pang-karon, “Kinabuhing walay katapusan, ug dili na Pagahukman sa silot, kondili miagi na gikan sa kamatayon ngadto sa Kinabuhi.” Ang Balaang Espiritu usa ka kasinatian sa pagkahimong puno ug pagkasinul-oban og gahum alang sa pag-alagad. Apan ang pagsugid ug pagdawat kang Cristo mao ang magkaaduna og pagtoo ug himoon ang inyong pagsugid, ug gawasnon na ingon nga gipasaylo na kamo sa Dios sa inyong mga sala.

275 Ug sumala sa Iyang Pulong, Siya miingon, “Walay tawong makahimo sa pag-ari gawas kon pagadanihon siya una sa Akong Amahan.” Kita n’yo? Bueno, gidani gyud kamo sa Dios, una. “Ug siya nga moduol Kanako, dili Ko gayud siya isalikway.”

Kita n'yo? Kita n'yo? Inyo—inyo nang gidawat kini. Ang bugtong butang, nga kinahanglan ninyong . . .

²⁷⁶ Siya—namatay Siya alang kaninyo. Gipasaylo na ang inyong mga sala, dise-nuebe ka gatus ka tuig na ang milabay. Igo na lang kamong mianhi karon aron dawaton kung unsa ang Iyang gibuhay para kaninyo. Kita n'yo? Ug nagatoo ba kamo nga namatay Siya tungod sa inyong mga sala? Dawaton ba ninyo Siya ingon nga halad-pasig-uli? Sa laing pagkasulti, ginadawat n'yo Siya, ingon nga giako Niya ang inyong mga sala.

²⁷⁷ Malipay ba kamo ug magpasalamat Kaniya tungod sa pag-ako sa inyong mga sala? Nagatoo ba kamo nga gibuhay Niya kana? Kung ingon-ana ipataas lang ang inyong kamot, og moingon, “Nagatoo ako nga giako Niya ang akong mga sala,” amen, “giako ang akong mga sala.” Oo.

²⁷⁸ Karon, kandidato na kamo karon para sa bautismo sa Espiritu Santo.

²⁷⁹ Pero kung wala pa ninyo nadawat ang Cristohanong bautismo, usa sa niining mga kalalaken-an dinhi ang magasiguro niana, aron nga madawat na ninyo ang Cristohanong bautismo.

²⁸⁰ Bueno karon, “Sa nagasulti pa si Pedro niini nga mga pulong,” sa wala pa sila nabautismohan, “sa nagasulti pa si Pedro niini nga mga pulong, mikunsad ang Espiritu Santo kanila.” Ngano man? Silang tanan nanagpaabot man. Karon nagapaabot sab kamo. Ginatinguha n'yo ang usa ka Butang karon nga—nga magaselyo kaninyo pasulod sa Ginghamian sa Dios, usa ka Butang nga mamahimong tinuod gyud kaninyo. Ginatinguha ninyong ma- . . . Dili ba ginatinguha man ninyong madawat ang Espiritu Santo, ang matag usa kaninyo? Dili ba ginatinguha ninyo Kini? Sigurado, gayud. Mao kana ang gahum nga nagapapabilin kaninyo. Kita n'yo?

Nanagkatigum sila sa hataas nga lawak,
Nagaampo sa Iyang Ngalan, ang . . .
Nabautismohan sa Espiritu Santo,
Ug miabot ang gahum alang sa pag-alagad.

²⁸¹ Kita n'yo? Oh, mao kana ang ginatinguha ninyo karon. Ug mahimo n'yong maangkon kana, karon mismo. Para kana kaninyo, karon mismo.

²⁸² Karon, mga igsoon, duol na mo. Atong, ang matag usa karon, ug ipandong ang atong mga kamot nganhi niini nga mga kaigsoonan, ug mag-ampo nga madawat nila ang Espiritu Santo. Duol dinhi mismo, mga igsoon. Duol mismo.

²⁸³ Karon, ang tibuok kongregasyon, ipataas ang inyong mga kamot karon, ang tanan! . . .? . . .

²⁸⁴ Langitnon namong Amahan, sa Ngalan ni Ginoong Jesus Cristo, pun-a ang matag kasingkasing dinhi sa bautismo sa Espiritu Santo.

²⁸⁵ Dawata n'yo ang Espiritu Santo. Dawata n'yo ang Espiritu Santo, kini nga mga tawo nga ania karon nga nanagtindog ug nanaghulat alang sa Presensiya ug sa gahum sa Dios nga motuhop sa ilang mga kinabuhi. 🐦

63-0114 Usa Ka Trumpeta Nga
Nagatingog Og Dili-matino Nga Tingog
Christian Assembly
Phoenix, Arizona U.S.A.

CEBUANO

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org